

Leveleseni

Mani kemona agimo aepa'a Kanite kefina mage huno hane “Fala kimainea yana alino fufute maleno ali falote humalene.” huno humaine. Mani avona haenagama falote hisia yana Yisasi Kalaisi'a himona kana yapi ali falote huno Yonina ave-ligeno Yoni'a kae-malenegeta nehavune. Yoni'a ani kanafina kosuna leteno nagola ti amu'nopi hanea kumate kina nopi maineno mani ya'yaga himona kana yapi ageteno kae-malene. Yisasi'a faliteno hetino ikapinaga haitegeno Yoni'a sikisiti faefu'a (65) kafu agava maineno Leveleseni kea kae-malene.

Mani kemona aepa'amo'a ma'a humaine.

¹ Nagaya Yoni'nae Yisasi Kalaisi'a navelige'na agete'na mani kea kae'na tamahapaigahe nehue. Nayona mani kemo'a fala-kino haneanagino Anumaya Koti'a ani kanamo'a aupa'a falote hisia yana Yisasi Kalaisina agai'a ali'ya vea'ne amavelisiafene huno Yonina ave-ligeno kae-malene. Yisasi'a ensole kano'a hutegenonagaya agai ali'yama ne'alua kanoa, Yoninile, ea'amo mani ya'yaga me naveli-maine. ² Me navelige'na age-mainoa yafe'ene Anumaya Koti kene Yisasi Kalaisi humainea kene ali'na tamage hu'na tamahanepauve. ³ Ma avopima kae-maloa kea ago aupa'a falote hisia yafe aune laga huno humainea kema hapali'ya havisaya vea'nene havite'ya akave'ma malesaya vea'nene tusi'a muse hugahae.

Yoni'a seveni'a (7) kumate hanea mono note avona kaeno amamine.

⁴ Nagaya Yoni'nae Esia kotega seveni'a (7) mono noma hanea vea'mogatamale mani avona kae'na nelamamue.

Anumaya Koti'a nayona maineanagino menienena maineanagino haenaga'a maisia kanogino agai'a kava yagai-mainea siamo aulega seveni'a (7) Avamu'mo'ya heti'ya mainayanagi'ya kayone hisaya ya'amienne tamaipa falu hisia ya'amienne tamamisae.

⁵ Tamamisageno Yisasi Kalaisi'a fatago huno Anumaya Koti kema hamapai-mainea kanomo'a fali-mainaya veapitila uhagote-lateno heti-maineanagino muki'a vea'nema fali-mainesafiti hetisaya katia valilatene. Muki'a mopafima mainaya sauve vaya'mogamina sauve'amimo'a agai'age maineanagino kayone hisia yama'aene tamaipamo falu hisia yama'aene tamamisie. Tagaifena hau ayamopafi haigeno agai'a kolama'a ailaki-talenea yateti muki'a kefo yatimo'a aigagilateneanagino agola ali kalu hetalene. ⁶ He-taleneanagino Anumaya Koti'a kava yagailatesia yapi tavaleno tategeta mainonaganita tagayama Nelafa Anumaya Koti ali'yama ne'alita agima alisaga huta musema hutesunafene huno hulatene. Hulateneanagita muki'a kanafina agai'agia alisaga hisunageno tokiya'age hale yama'amo'a agola hanege hanege huno hanesie. Tamage.

⁷ Ageho Yisasi'a siate maiteno egahigi muki'a amakave'noma hutete'ya augafafima kevema aye-mainaya vea'nene muki'a ma mopafima

mainaya vea'mo'yaene agete'ya tusiya hu'ya hamau hute'ya avi tegahae. E, ani yana tamage huno falote hugahie. Tamage.

⁸ Ala Anumaya Koti'a mage huno humaine “Nagaya nagai'ni'a muki'a tokiyamona aepa'a mainoanagi'na muki'a yatela kava yagai-mainoafe alivayyesua kanoa tamage hu'na mainoe. Nayo kanafina mainoanagi'na menia mainoanagi'na haenaga'a maigahue. Tusi'a tokiya'nia hanea kava kano mainoe.” huno hu-maineane.

Yoni'a Yisasina age-maine.

⁹ Nagaya Yoni'nae neputamimo'na tamakai'enena Yisasi'ene ailokaeta mainona yafe tusi'a kana ya'ene tagata aiya ya'ene falote hianagi Anumaya Koti'a kava yagailategeta mailava huta tokiya'age huta mainone. Nagaya Anumaya Koti kene Yisasi'a tagai'ma hulatenea mono kene huhale'na hua yateti navale'ya Patimosia ti amu'nopi hanea kumate kina hunatage'na mainoe. ¹⁰ Mainogi nago Sota'yupa Alu Aotage Avamu'mo'a tokiya'age huno natafa hige'na nehavugeno nakavelagati nagola ala kegefamo'a ufema nehaya avamete huno agea aige'na havimainoe. ¹¹ Ani kemo'a mage huno humaine “Muki'a yama agesana yana avopi kaeteka atalegeno seveni'a (7) kumate hanea mono note veatega vino. Efesusiene Simenaene Pegamumuene Taiyatailaene Satisiene Filatelefiene Leotisia'ene vino.” huno humaine.

¹² Hige'na kema nahapaiya kanoma agesuafene hu'na maiyahae hu'na agoana seveni'a (7) lamua kanileta yafateti talo

humale lamua hanege'na age-mainoe. ¹³ Agoa lamuyagamo amu'nopina nago kanoa, ikapinagati emainea kanoa vaya'mo atenea nafa'nemo augafa kana kanoa hetino mainegenoa aya'aya kenamo'a aiyalega vai-talegeno tavigeno kanileta yafateti talo humale amu'nofila aigagino haifi'yafale hu-malenege'na agoe. ¹⁴ Agogeno ayolagefamo'a efe'age huno sipi sipimo ayolagefaleti talo humale nofi kana huteno efe'age sia kana nehigeno aulagamo'a ata nefemo'ma hia avamete humane. ¹⁵ Higeno aiyamo'a nagola atafima kae-malageno teno tokiya'age huno hale yama'aene kanileta yafa kana nehigeno agema aiya agemo'a paugagefa nehigeno ala timo agemo'ma ne'aiya avamete kava huno aimaine. ¹⁶ Ayapina seveni'a (7) ka'nefi atafa hu-linegeno avayafitila tole kaiyaga ave'ne'ne naepe ka'yona anikofi-linegeno augosamo'a yagemo'ma hia kava huno aigalu galu huno aivasa humane. ¹⁷ Aigalu galu hige'na ne'age'na fali-mainea vaya kana hu'na aiyafi nago'ya aye-mainogeno tamaga ayana naugafale maleno mage huno hie “Kolia ohuo nagaya muki'a tokiyamona aepa'a mainoanagi'na nagaya uhagote'na maite'na haenagalafana maite'na hu'na mainoa kano mainoe. ¹⁸ Nagaya nahaimu'ene kano mainoe. Nayona ago fali-mainoanagi ago heti'na haegafa hu'na agola muki'a kanafina maige maige hu'na mainoanagi'na vea'ma nefalia ya'ene fali-mainaya vea'mo'ya mainaya kumate ki nofitela ali-line'na ani yapiti'ma amavale'na amatalesua

himamu'nia hane. ¹⁹ Haneafe kagaya menima falote higeka agana ya'ene haenagama falote hisia ya'enena avopi kae-malo. ²⁰ Seveni'a (7) ka'nefi'ene seveni'a (7) kanileta yafateti talo humalenaya lamuenena tamaga nayapima hanegeka agana yamo'a falaki-mainea yamo aepa'a kahapaigahue. Seveni'a (7) ka'nefi'mo'a ma'a humaine seveni'a (7) kumate'ma Yisasife havi'ya melitalu nehaya veate kava vayafe* humaine. Seveni'a (7) lamumo'a ani seveni'a (7) mono no'yagafi Yisasife havi'ya melitalu nehaya veafe humaine.”

2

Efesusi mono note mainaya veatega ma kemo'a umaine.

¹ Efesusi mono note mainaya veate kava kanohena* mage huka kao nagaya tamaga nayapina seveni'a (7) ka'nefi atafa huline'na seveni'a (7) kanileta yafateti talo humalenaya lamumo amu'nopi ute ete nehua kanomo'na mani kea tamahanepauve. ² Nagaya tamakai au'ava yatamia ago age-mainoe. Tusi'a kasageke-voke hutama ali'yama ne'aliya yafe'ene mailava hutama tokiya'age'ma hutama nemaiya ya'enena ago age-mainoe. Kefo yama nehaya veafena “Havigege'yama nehaya yamo otahaiya vayala mainayanagita tamakai kea ohavigahune.” hutama nehae. Nehage'ya ani vaya'mo'ya havige hu'ya “Tagayaenena Aposolo vaya mainone.” hu'ya nehayanagi tamakaya ke'amia ago havitama fako hutama haviyana “Havigege'ya mai'ya nehaya vaya mainae.”

hutama nehae. ³ Tamakaya nagai nagima alilina'ya ali haviyama hulamatayanagi kasalola otamahaenegi lokiya vaitama mainaya yafena ago tamake-mainoe. ⁴ Na'a nehayanagi nago'a kavala havi kava nehae. Hagotetama nagai kea havitama lamakupi maletama tamaku'a kanale'ya hutama namitetamagi menia ani yana ago ne'ataletama ali hataga huligeno osi nehie. ⁵ Nayoma tamahau tamayamopafi tamahau-mainea yafena tamakesa havi havi hiho. Menia ago ne'ataletama asaga hulavi-mainagi tamaku'a aiyahae hutama nago'ene ehe'ma humainaya kavala etetama hiho. Tamaku'ama aiyahae ohisage'na nagaya esua'amo'na lamutamia meli'na atalegahue. ⁶ Atalegahugi tamakaya nagola kanale au'ava yana ago hage'na age-mainoe. Tamakaya Nikolasi mono kema nehavi'ya amaugafa age hama'yema nehaya yafena tusi'a lamaipa kafa he ne'amatae. Nagayaenena ani'ama nehaya kava'amihena naipa kafa he ne'amatoe.

⁷ Nagi tamakesama hanesimogatama Avamu'mo'ma Yisasi kema haviya melitaluma nehaya vea'mogamifema hia kea haviho. "Nago'a vea'mo'ya Satani'ene tuma hu'ya agasesayana Anumayamo kumate ikapinaga hanea yosa, agola maige maige hisaya hamaimu amamisia yosamo alaga 'Neho.' hu'na amamisuge'ya negahae." huno humaine.

Simena mono note mainaya veatega ma kemo'a vie.

8 Simena mono note mainaya veate kava kanohena* mage huka kao nagaya uhagote'na maite'na haenagalafana mainoe. Fali-mainofitila ago ete'na heti'na mainoe. 9 Tamakaya kana yapi mainetama muki'a yatamia omale vea'ne mainayanagi Anumaya Koti'a kanale yana ago tamamige'na nagaya ago age-mainoe. Nago'a vea'mo'ya “Tagaya Yuta vea'ne mainone.” hu'ya nehayanagi Yuta vea'nea omainagi Satani anaga maine'ya huhaviya hu-lamataya yana nagaya ago age-mainoe. 10 Tamakata aisia yana aligahayanagi kolia ohiho. Haviho Satani'a aye lamavataga hisige'ya nago'a vea'mogatamina nofila hulamategahae. Teni'a (10) kanafi* ani kana ya'ene tamakata aisia ya'enena aligahayanagi havitama lamakupi malenaya yana atafa hulinetama falisage'na ani yateti kanale miyana anonatamia maige maige hisaya tamahaimula tamamigahue.

11 Nagi tamakesama hanesimogatama Avamu'mo'ma mono note mainaya vea'mogamifema hia kea haviho. “Satani'enema tuma hutama agasesaya vea'mogatama tole yupama etetama falisaya yamo'a, hani yapima tegelege nehia atafina visaya yamo'a, ali haviya hu otamategahie hu'na nehue.”

Pegamumu mono note mainaya veatega ma kemo'a umaine.

12 Ma kemo'a Pegamumu mono note mainaya veate kava kanohena mage huka kao tole kaiyaga ave'ne'ne nehia naepe ka'yona alilinoa kanomo'na mage hu'na nehue. 13 Tamakaya

Satani'ma mainea siamo hanea kumate mainage'na ago tamake-mainoe. Ani kumate mainayanagi nagai nagia atafa hulitama tokiya'age hulinageno nago kanoa, Atipasi'a, tamakai'ene maineanagino kolia ohunegi muki'a kanafina efi efi huno Yisasi kea huhaleno nehige'ya atafa hu'ya ani kumate hayageno fali-maineanagi ani kanafi'enena tamakaya nagia atafa hulinetama nagaifena havitama tamakupi malenaya yana o'atalenae. ¹⁴ O'atalenagi nago'a kefo yana nehageno naipamo'a haviyana nehie. Tamakai amu'nopina nago'a vea'mo'ya Palamu'ma humainea kea atafa hu'ya akave nemalae. Nayona Palamu'a Isaleli vea'mo'ya asaga hu lavisae huno Palakina mage huno hapai-maine “Mage huka hamapaiyo ‘Amayateti talo humalenaya afa yafe ‘Anumayati maine.’ hutama amiya kavela nenetama kumai kavala hiho.’ huka amaipa ayesana kea hamapaiyo.” huno humaineane. ¹⁵ Na'a hianagi tamakaipitila nago'amo'ya Nikolasi'ma hia mono kemono akave nemalae. Ani kemo'a Palamu'ma hia avamete humainea ke. ¹⁶ Ani kefo yafena tamaku'a aiyahae hutama nago'ene ohisaya tamakesa haviho. Aiyahae ohisage'na nagaya osi kana kano'a maite'na tamakaitela esua'amo'na navayafima hanea ave'ne'ne naepe ka'yoteti amakai'enena tua hugahue.

¹⁷ Nagi tamakesama hanesimogatama Avamu'mo'a mono note'ma ne'vaya vea'mogamifema hia kea haviho. Satani'enema tuma hu'ya agase-mainesaya vea'mogamina falakino hanea kavela, manae hu'ya nehaya

kavela ne'amami'na nagola efe'age yafatela hamaote hamaote haegafa amakima kaemalenoa yafana amamisuge'ya nago'a vea'mo'ya ani amakiyaga o'agegahagi agai'a yafama alisimo'a agai'age agegahie.

Taiyataila maine'ya mono note ne'vaya veatega ma kemo'a umaine.

¹⁸ Taiyataila maine'ya mono note'ma ne'vaya veate kava kanohena* mage huka kao nagaya Anumaya Koti nafa'nemonia naulagamo'a ata nefe'mo hia kava humainegenonaiyamo'a haesa yafamo vaga'yo vaga'yo hia kava humainege'na tokiya'age hu'na heti-mainoa kanomo'na mani kea nehugi kao. ¹⁹ Nagaya tamakai au'ava yatamia ago age-mainoe. Nagai'fena tamahau tamayamopafi nelamahaigetama havitama tamametiti hutetama nagai ali'yama aliyana mailava hutama tokiya'age humainage'na tamake-mainoe. Menima nehaya yamo'a hagotetama humainaya yamona ago agasetama kanale kava nehae. ²⁰ Nehayanagi nago'a kefo yama nehageno'a naipamo'a haviya nehie. Nago a'mo agia Yesepeli'e mage huno humaine “Nagaya Anumayamo aune a mainoe.” huno havigea nagai ali'ya vea'mogamina ayemavataga huno mage nehie “Kumai yana nehutama amayateti talo humalenaya afa anumayamoma amiya kavela neho.” huno humaine. ²¹ Hige'na nagaya ani a'mofena “Kumai yakahena kagu'a aiyahae huka nago'ene ohisana kagesa havio.” hu'na agava mauvanagi agu'a aiyahae nohie. ²² Aiyahae nohiafe nagaya tusi'a agata aisia

kalia ne'ami'na ani a'enema kumaima nehaya vea'nene kefo ya'amihema amakaye hu'ya amaku'ama aiyahae ohisage'nahena tusi'a kana yana amamigahue. ²³ Ne'amami'na ani a'mo kema akave nemalaya vea'mogamina hamaesuge'ya faligahae. Falisage'ya muki'a Anumaya Koti anaga'mo'ya agete'ya nagaya vea'mogami amaku amakesa tamagelegati'ma hu'na fako nehua kano mainoa yafena havigahae. Muki'a vea'mogatama nehaya kavala agete'na ago'ma humainaya yateti anonatamia tamamite lamamite hugahue.

²⁴ Hugahugi nago'a Taiyataila mainaya vea'mogatama ani a'mo kea akave omaletama Satani kema falakino hanea kema ohavinaya vea'mogatama nago'a kahegi kea tamahaopaigahue. ²⁵ Tamahaopaigahugi muki'ama atafa hulinaya kea atafa hutama tokiya'age hu-linetama maima maima ne'vige'na nagaya ete'na ano. ²⁶ Satani'ene tuma hu'ya agase'ya nagai kema akave maleme maleme haisaya vea'mogamina nagaya tokiya'nia amamisuge'ya muki'a veatela kava yagaigahae. ²⁷ Nenafa'a tokiya namige'na kavama ne'yagauva tokiya'nia ani'a hu'na tamamisugetama tokiya'age hutama kava yagaigahae. Vea'mo'ya mopa susufanele'ma aiko neligeno aposino yagi-yagipe nelavia avamete kava hu'ya yagaigahae. ²⁸ Kava yagai-mainesage'na natema eva'yi nehia ka'nefi'mo'a tusiya huno aivasa huno hale yamaene ka'nefila tamamigahue.

²⁹ Nagi tamakesama hanesimoga-

tama Avamu'mo'a mono note ne'vaya
vea'mogamifema hia kea haviho.

3

*Satisi maine'ya mono note ne'vaya veatega ma
kemo'a umaine.*

¹ Satisi maine'ya mono note ne'vaya
veate kava kanohena* mage huka kao
nagaya seveni'a (7) Anumayamo Avamu'ene
seveni'a (7) ka'nefi'yagaene nayapina atafa
hulinoa kanomo'na mani kea tamahanepauve
“Nagaya tamakai au'ava yatamia ago tamake-
mainoanagi'ya vea'mo'ya tamakaifena ‘Agola
maige maige hisaya hamaimu hanea veale.’
hu'ya nehayanagi tamakaya nagai kema atalaya
yafena ago fali-mainae. ² Faligahe hayanagi
tamau'ma fae-maiya yana ne'ataletama hetitama
kanale au'ava yatamia ali lokiya vaiho. Nagaya
agoana au'ava yatamimo'a Anumayani'amo
aufina fatago ohunae. ³ Ohuneanagitama ago'ma
havi-mainaya mono kehena tamakesamo'a hao
hinagetama akave maletama kefo yatamihena
tamaku'a aiyahae hiho. Fae-mainesaleti'ma he
otisayana nagaya ‘Omegahie.’ hutama hisaya
kanafi musufa vaya kana hu'na esua'amo'na
kefo yamo anonatamia me lamamigahue.
⁴ Me lamamigahuanagi nago'a Satisi mainaya
vea'mo'ya kanale'ya hageno amaku'amo'a
oni'ya'agela ohunea vea'ne mainayanagi'ya
efe'age kena'amia faimatesuge'ya amatesia kava
hu'ya nagai'ene ailokae'ya vaiyegahae. ⁵ Vai

ne'ayesage'na Satani'ene tuma hu'ya agase-mainaya veala efe'age kena faimategahue. Maige maige hisaya hamaimu hanesia vea'mogami amakima kae-malenoa avopi ani vea'mogami amakia haneanagi'na aye ohananegahuanagi'na amakai amakia Nenafa aule'ene ensole vea amaule'ene huhale'na hugahue.”

⁶ Nagi tamakesama hanesimogata-tama Avamu'mo'a mono note ne'vaya vea'mogamifema hia kea haviho.

Filatelfia maine'ya mono note ne'vaya veatega ma kemo'a umaine.

⁷ Filatelfia maine'ya mono note ne'vaya veate kava kanohena* mage huka kao nagaya Anumaya Koti'na alu aotage kanogi'na tamagelafa nehue. Teviti'ma kava yagai-mainea ki nofila nagaya ago ali'na fita yaki-malenoanagino nago kanomo'a eteno alino fita okigahie. Nagaya fita ago ali'nama ki-malesugeno'a nago kanomo'a alino o'yakigahie.

⁸ Nagaya mage nehue tamakai au'ava yatamia ago age-mainoe. Ageho tamakai tamaufina fita ago yaki-malogeno visaya fiamo'a hane. Ago'ma yaki-malenoa fita nago kanomo'a eteno alino okigahie. Tamakaya osi kano'a tokiyatamia hanegetama nagai kea akave nemaletama nagai nagia ali fala okige'na age-mainoe. ⁹ Haviho nago'a vea'mo'ya mage nehae “Isaleli vea'ne mainone.” hu'ya havigea nehayanagi Satani vea'ne mainayanagi'na nagaya amakaila ali'na tamaiyafinaga amatesuge'ya “Ago tagase.” hu'ya ape humaine'ya nagaya tamakaifema

nayamopafima nenahaiya yana amavelisuge'ya agegahae. ¹⁰ “Kana yapina tokiya'age hutama mailava hutama maiho.” hu'nama hu-mainoa kea ago akave malenagi muki'a ma mopafi vea'mogamina avame'ma humatesua yapina tusi'a kana yamo falote hugahianagi'na tamau vaisugetama tamakaya ani yapina omaigahae. ¹¹ Nagaya naiyaye'na aup'a egahugi. Atafa hulinaya kea atafa hutalako hulisayana nago'a vea'mo'ya tamamisua kanale yana tamahaofalegahae. ¹² Atafa huline'ya Satani'enema tuma hu'ya agasemainaya vea'mo'ya no yosamo avamete kana hage'na Anumayamo mono nopi aye'na ali hetimatesuge'ya maigahayanagi'ya ete'ya o'utafa hu'ya o'ugahayanagi'na amaugafale Anumayani'amo agiene Anumayani'amona ikapinagati esia kuma'mo agia, haegafa Yelusalemu kuma'mo agiene nagaila haegafa nagiene amaugafale kaemategahue.

¹³ Nagi tamakesama hanesimogatama Avamu'mo'a mono note ne'vaya vea'mogamifema hia kea haviho.

Leotisia maine'ya mono note ne'vaya veatega ma kemo'a umaine.

¹⁴ Leotisia maine'ya mono note ne'vaya veate kava kanohena* mage hukā kao nagaya kelamage kemona aepa'a maine'na efi efi hu'na muki'a kanafina kea huhale'na nehue. Nagaya muki'a Anumaya Koti'a ehe'ma taloma humalenea yamona aepa'a mainoanagi'na mani kea mage hu'na tamahanepauve. ¹⁵⁻¹⁶ Nagaya tamakai au'ava yatamia ago age-mainoe.

Nagai kemona tamakave'nona ohunayanagi tamakupina yasi'age humainegeni amukoa nohie. Nagai kemo'a tamakupina amuko'age'ma hu-mainele'asina musena hule'asinagi nagai kea osi'a tamakupina malenageno muvalisua naipa nehige'na nagaitegatila tamavale'na haga'yu hu-lamatalesua nagesa nehie. ¹⁷ Tamakaya mage hutama nehie “Kasago'ya afeno'yatia hai ali-mainone. Nago ya kano'ahena aupa nohune.” hutama nehayanagi tamakaya havige nehagi haviyatafa hutama mainayanagi'ya vea'mo'ya tamake'ya kalagi ai-lama-tesaya avamete hutama muki'a yafena aupa hutama mainageno tamaulagamo'a asu hu-mainenetama tamaugafa alapa'age vea'ne kana hutama mainaya yafena tamakaitamia no'lagae. ¹⁸ Na'a humaineafe mani kea tamahanepauve mone afeno'ene vea'nema maisayafena nagaitegati kanileta yafana, atafi kae-malenaya yafana me miya hiho. Tamaugafa alapa'age mainageno tamakaye hisia yama aiso hisayafe efe'age kena me miya hutama failiho. Tamaulagafima falesaya masavena tamamisuetama falesageno tamaulagamo'a kanale hinagetama agegahae. Ani ya'yaga nagaiteti me miya hiho. ¹⁹ Nagaya nayamopafima nahaiya vea'mo'ya nagai kema havi'ya akave malesaya yafena ka'yo kevea ne'amamuafe aluya hutama lamakesa nehavitama kefo yatamihena tamaku'a aiyahae hutama “Nago'ene ohugahune.” hutama hiho. ²⁰ Ageho nagaya fiate heti-mainena tamakaifena kea nehuanagitama ani kema

nagoke nagoke'mogatama havitetama fitama yaki-natesayana haifale'na tamakai'ene tokaeta maineta kavela negahune. ²¹ Nago'a vea'mo'ya Satani'ene tuma hu'ya agasesaya veafena mage hu'na humategahue “Nagaya Satani'enena tua hu'na agasete'na Nenafa'ma kava yagai-mainea sialela agai'ene me lokae'na mainoa avamete hutama nagai'ene kava yagaigahae.” hu'na humategahue.

²² Nagi tamakesama hanesimoga-tama Avamu'mo'a mono note ne'vaya veafema hia kea haviho.

4

Ikapinaga maine'ya Anumaya Koti agia alisaga nehae.

¹ Yoni'a mage huno hie ani kemo'a ha'noma hige'na agoana ikapina nago fita yaki-malenea fiana age-mainoe. Ne'agogeno hagote'nama ufema nehia augafa agema aige'na havua augafa kea nago'ene havuana mage huno hie “Male ehaige'na muki'a yama anile'ma falote hisia yana kavelino.” huno hie. ² Higeno aupa'a Anumaya Koti Avamu'mo'a tusiya huno natafa hige'na agoana ikapinaga nago sia agogeno ani siale nago kanoa maine. ³ Ani siale'ma mainege'na agoa kanomo augafamo'a tusiya huno aihasesa huno alave alave huteno aihalege'na age-mainoe. Agogeno nago'ma alave alave hiana yosa haisa fulagena'mo'a sauve kanomo siale aigagi-maineno aihanelege'na age-mainoe. ⁴ Ne'agogeno tueti fo'a (24) sia ani sauve kanomo siale maigagi-mainage'ya

tueti fo'a (24) kava vaya'mo'ya ani siayagale mainae. Maine'ya efe'age kena'amia failine'ya amanutela sauve vea'mo'ya kanileta yafateti talo humale tumano ku'ma vai ne'aliya avamete hu'ya vai-linae. ⁵ Anumaya Koti sialeti aulumaya alino monagemo huno alu ge lu gema aiya yamo'a anifiti falote humaine. Anumaya Koti siamo aulega seveni'a (7) lamua aivasa humaine. Ani lamua Anumayamona seveni'a (7) Avamu'amo'ya mainae. ⁶ Mainageno Anumaya Koti siamo aulega nago tikotuna hanegenotelelalayama'a tamage huno omalegeno galasimo'ma alave alave hia avamete humaine. Fo'a (4) hamaimu'ene anaga'mo'ya heti'ya ani siale maigagi'ya mainageno amaulaga kasago'ya haneteno amaulegaene amakavelagaene alino ano'vai-maine. ⁷ Hagote haimu'ene kanomo'a kave'age afua, laiyoni afu kana higeno anile haimu'ene kanomo'a pulamaka kana higeno anile haimu'ene kanomona vaya augosa kali-maigeno anile haimu'ene kanomona anale haleno vai ne'ayea haki kana nama kana humaine. ⁸ Ani fo'a (4) hamaimu'ene anaga'mo'ya sikisi'a (6) amageko'na hanegenokasago'ya amaulagamo amaugafamona agupilegaene amageko'namona afepinagaene alino vai-maine. Vai-mainageno felugaene kege'ene mage hu'ya huge huge nehae

“Anumaya Koti'a muki'a tokiyamona aepa'a maineno kefo yana nohigi tusiya huno alu aotage kano maine. Nayo'ene meniene maineanagino haenaga'a maisia kano maine.” hu'ya humainae.

9-10 Hamaimu'ene anaga'mo'ya sauve kanomo siale maiya kanoa, agola maige maige nehia kanomofena, mage hu'ya hae “Tokiya'age hale yama'a hanea kagia alisaga nehuta tusi'a muse nehune.” hu'ya nehage'ya ani tueti fo'a (24) kava vaya'mo'ya sauve kanomo siale maiya kanoa agola maige maige nehia kanomo aule mope hu'ya agia alisaga hugahe ali-mainaya kanileta yafateti talo humale tumano ku'amia ali'ya ani siamo aiyafi mo malae. ¹¹ Mo nemale'ya mage hu'ya hae

“Vaeha tagai Anumaya Kotigae kagaya muki'a yana ‘Na'a hu'na talo hugahue.’ huka humainanafe muki'a yana talo humalanageno haneafe tagaya tokiya'age hale yama'aene kagia alisaga nehuta tokiya'age kano mainane huta kagia alisaga nehune.” hu'ya hae.

Hage'na nagaya Yoni'na himona kana yapi age-mainoe.

5

Yoni'a nagola avoma kae-male omana ha'ya ki-malenegeni age-maini.

¹ Nagaya Yoni'nae agoana ani sauve kanomo siale'ma maiya kanomona tamaga ayapina nagola avoma kae-male omana aye-gafage ki-malegeno hane. Ani omanamona amegaene agusafinagaene avona kae-maleteno vea'mo'ya o'agesayafene huno atupale seveni'a (7) menimo fuki kana yateti aye ka'mae-malene. ² Aye ka'mae-malenege'na agoana nagola tokiya'a

hanea ensole kanomo'a ala kegefafiti keha keha huno mage hie “Hana kanoa atesia kanomo anima menimo fukiteti aye ka'mae-malegeno hanea omana ali vaka yegahie?” huno hie. ³ Hige'na agoana atiye'yama agayana ikapinagaene mopafi'ene mopamona afepinagaene nagola ani avoma ali vaka yesigeno atesia kanoa omaine. ⁴ Nagola ani avoma kae-male omanama ali vaka yesigeno atesia kanoa omaige'na agete'na tusiya hu'na avia ate-mainoe. ⁵ Ne'atogeno tueti fo'a (24) kava vayapiti nago kanomo'a nagaifena mage huno hie “Avia o'ateka havio nago kanoa Teviti aginagomo'a, kave'age laiyoni afu kana humainea kanoa, Yuta nofipiti kanogino, Satani'ene tua huno ago agase-maineafe ani avoma kae-male omana seveni'a (7) menimo fukiteti aye ka'mae-malenea yana ali hakao huteno ali vaka-yegahie.” huno humaine.

Yoni'a Sipi sipi nafa'nea age-maine.

⁶ Ani sauve kanomo siamo amu'nopina nagola Sipi sipi nafa'nea heti-mainege'ya fo'a (4) hamaimu'ene anaga'yaene tueti fo'a (24) kava vaya'mo'yaene agaila mai kagi-mainage'na age-mainoe. Agoana ani Sipi sipi nafa'nea maiyanagi hayageno'ma fali-mainea afu kana huno seveni'a (7) ave'ene seveni'a (7) aulagaene hane. Ani aulagayaga seveni'a (7) Anumaya Koti'a hutegeni muki'a ma mopafi vaiyatete nehia Alu Aotage Avamulagi'ya mainae. ⁷ Ani Sipi sipimo nafa'nemo'a via'amo sauve kanomo siale mainea kanomona tamaga ayapiti ani avoma kae-male omana ali-maine. ⁸ Alige'ya fo'a (4)

hamaimu'ene anaga'yaene tueti fo'a (24) kava vaya'mo'yaene ani Sipi sipimo nafa'nea avate mope hu'ya muki'amo'ya gita kana yana yagame nehaya ya'ene kanileta yafateti talo hu-malenaya yopaene atafa hulinae. Ani yopafina mana'age halinamo humainea ta'nefamo'a havate-maine. Ani mana'age halinamo'a ma'a humaine vea'mo'ya nunamuma nehu'ya Anumayamo agima alisaga nehageno Anumayamo avate vigeno havigeno aipamo'a kanale higeno haga'age manama nehavia kava humaine. ⁹ Ani anaga'mo'ya Sipi sipi nafa'nemofena mage hu'ya yagamea humainae

“Kagaila kahayageka fali-mainana kolateti ma mopafi vea'mogamina, alu kote kotega vea'nene, alu make alu make ne'aiya vea'nene, alu amaugafa alu amaugafa kalimainea vea'nene, kefo ya'amimo alino ha'yagimatenegeka kagayama fali-mainana kolateti anifiti aligalu heka amavayu huteka Anumaya Koti vea'ne maisaya yafe muki'a ago miya humatenane. Miya humatenanafe kagaila kanale ya huno katea kava hana kano mainananagika anima aye-gafage ki-malete'ya menimo fukiteti aye ka'mae-malenea avo omana alika ali hakao hisana tokiyaka'a hane. ¹⁰ Anumaya Koti'a kava yagai-lamatesia yapi ago amatanage'ya Anumaya Koti agia alisaga nehu'ya agai ali'yana ne'ali'ya ma mopafi vea'mogamina kava humategahae.” hu'ya yagamea hage'na havimainoe.

Sipi sipi nafa'nemo agia alisaga humainae.

¹¹ Havite'na agoana kasago'ya ensole vayala teni milioni'a (10,000,000) ensole vaya'mo'ya het'i'ya Anumaya Koti'ma nemaiya siale'ene fo'a (4) hamaimu'ene anagaene tueti fo'a (24) kava vaya'mo'yaene maigagi'ya maine'ya ala kegefafiti mage hu'ya hage'na havimainoe.

¹² “Ani Sipi sipi nafa'nea hayageno faliteno heti-mainea kanogino tusi'a kanale kano maineanagino atesia napama'a aliteno tusi'a tokiya'a hanenageno muki'a kanale ya'ene kanale havi havi'ya'ene hanea kanogino kava hisia tokiya'aenena haneanagita tokiya'age hale yamaene agia alisaga hisunageno anale hanesigeno muki'a muse hisia yana alisie.” hu'ya hae.

¹³ Hage'na havugenno muki'ama Anumaya Koti'a talo humalenea yamo'a ikapinaga mainaya ya'ene mopafima mainaya ya'ene mopamo agusafinagama mainaya ya'ene tipima mainaya ya'enena muki'amo'ya mage hu'ya hae

“Sauve kanomo siale mainana Anumaya Kotigaene Sipi sipi nafa'nene agola muki'a kanafina muse hisa'a yamo'a hanege hanege huno hanesie. Tokiya'age hale yama'aene tanakia haneanagita alisaga hisunageno anale hanesigetana kava hisa'a tokiyatanimi'a hanege hanege huno hanesie.” hu'ya hae.

¹⁴ Hage'ya fo'a (4) hamaimu'ene anagamoy'a “Tamage hu'ya hae.” hage'ya tueti fo'a (24) kava vaya'mo'ya ape hu'ya Anumayamo agia alisaga humainae.

6

Sipi sipi nafa'nemo'a menimo fukiteti aye ka'mae-malenea fukina ali hakao humaine.

¹ Nagaya Yoni'na agoana Sipi sipi nafa'nemo'a ea'amo nagola menimo fukiteti aye ka'mae-malenea fukina ago melino hakao hige'na havuana fo'a (4) hamaimu'ene anagapiti nago'mo'a agea aige'na havuana agema aiya agemo'a monagemo'ma hia avamete huno mage hie “Male eno.” huno hie. ² Hige'na agoana nagola efe'age hosi afua agogeno nago kanomo'a ani afumo agupifi maineno ati kevea huno atafa hu-lineno tumano kula, vaya'mo'ya kame vaya'amima tuma hu'ya amakase-mainaya vaya'mo'ya vai ne'aliya tumano kula amigeno nago'ene kame vaya'amienena tua huno amakasegahe umaine.

³ Vigeno ani Sipi sipi nafa'nemo'a anile menimo fukiteti aye ka'mae-malenea fukina melino hakao hige'na havuana fo'a (4) hamaimu'ene anagapiti anile tu (2) molia kanomo'a mage huno hie “Male eno.” huno hie. ⁴ Hige'na agoana nagola kolama'age hosi afua agogeno nago kanomo'a ani afumo agupifi mainegeni ala ave'ne'ne naepe ka'yo'ene muki'a ma mopafi vea'nene tuma hisia tokiya'aene amigeno aliteno ma mopafi vea'mo'ya tuma hu'ya hamaesage'ya falisaya amakesa ago amamineanagino amaipa falu hu'ya maisaya yamo'a muki'a ma mopafina ago ha'no humaine.

⁵ Ani Sipi sipi nafa'nemo'a tagufa (3) molia menimo fukiteti aye ka'mae-malenea

fukina melino hakao hige'na havuana fo'a (4) hamaimu'ene anagapiti tagufa (3) molia kanomo'a mage huno hie “Male eno.” huno hige'na agoana nagola anupa hosi afua agogeno nago kanomo'a ani afumo agupifi maiya kanomo'a sigelima nehaya yana ayapi alilino emaine. ⁶ Alilino mainege'na ne'age'na havuana fo'a (4) hamaimu'ene anagapiti nago agema aige'na havua agemo'a mage huno hie “Nago kanomo'a nagoke yupa nate aepa heno ali'yana alime alime visia'amo unema ha'no hisige'ya amisaya miyateti tole osi ke'ayopi laisimo alaga fako huka amamio. Ani avamete miyana kamisageka sikisi'a (6) maya ani'a huka amamio. Ani'a huka amamigananagi olivi yosama hanea yosamo alagafiti masavema ne'aliya yosayagaene nofi alagamo tima'a ali'ya tatite'ya nenaya nofi'ene alika haviyana ohuo.” huno hie.

⁷ Hige'na agoana Sipi sipi nafa'nemo'a foa (4) molia menimo fukiteti aye ka'mae-malenea fukina melino hakao hige'na havuana fo'a (4) hamaimu'ene anagapiti foa (4) molia kanomo'a mage huno hie “Male eno.” huno hie. ⁸ Hige'na agoana nagola kanileta hosi afua agogeno ani afumo agupifi maiya kanomo' agia “Vaya fali yamo'e.” hu'ya ne'ayaya kanomo' akave'ma via kanomo' agia “Fali-mainaya vea'ne ne'vaya kumale.” hu'ya agia ne'ayaya kanomo'a akave vige'ana va'ana ani tole kanolatamogania tusi'a tokiya anamige'ana muki'a ma mopafi mainaya veala ali fako hu'ana fo'afi (4) amatage'ya maiya anagapiti nago'a vea'mogamina he-falimatesia

tokiya'ania ali-maina'e. Ali'age'ya nago'amo'ya tu hute'ya fali-mainagi nago'amo'ya kafu hu'ya amakatege'ya fali-mainagi nago'amo'ya alu kali lu kali ali'ya fali-mainagi afai kalamo'ya nago'amogamina hamaesage'ya falisaya tokiya'ania ali-maina'e.

⁹ Na'a higeno Sipi sipi nafa'nemo'a faefua (5) molia menimo fukiteti aye ka'mae-malenea fukina melino hakao hige'na agoana Anumayamofe amakesa havi'ya sipi sipia he'ya folamole kae salamana hu'ya nemalaya folamo kana folamo ikapinaga hanege'na agogeno ani folamomo aiyafina Anumaya Koti kema havi'ya atafa hu-line'ya huhale'ya humainaya yateti'ma hamayage'ya fali-mainaya vea'mogami amamena amake-mainoe.

¹⁰ Agoge'ya ani amamemo'ya ala kegefafiti mage hu'ya hae “Tokiyaka hanea Anumayatimogae alu aotage kanomoga tamagege'ya nehane. Ma mopafi vea'mo'ya tahayageta faliteta malela emainonanagika ani'ama humainaya yatetila kagaya na yu kaiyekea hu-mateteka kefo ya'amimo anona'amia amamigane?” hu'ya hae.

¹¹ Nehageno efe'age aya'aya kena'amia alino amamiteno mage huno hamapaiye “Maifalu hutama mainege'ya tamafu-tamakana'ya tamakai'ene Yisasi ali'yama ne'ali'ya agai kema huhale'ya nehaya yateti tamakai'ma hulamatenaya kava hu'ya hamaesage'ya falite'ya esage'na kame vayatamia kaiyekea humategahue.” huno hie.

¹² Huteno Sipi sipi nafa'nemo'a sikisia (6) molia

menimo fukiteti aye ka'mae-malenea fukina melino hakao hige'na agoana tusi'a imi aligeno yagemo'a asu huno hanima'age higeno ikamo'a haesa ko tino kola kana humaine. ¹³ Higeno yasimo'a yosamona mo lifagagi me lifagagi higeno afuma otenea yosa alagamo'a halali hulavia kava huno ka'nefi'yagamo'a ikapitila atafai-lavi-maine. ¹⁴ Ikamo'a iva yuguma alitama aye kafage kitama ha'yama negiya kava huno ikamo'a fanane higeno muki'a ago'yaene ti amu'nopima hanea mopaene no'amia atale'ya nago'ene omalena. ¹⁵ Na'a higeno muki'a ma mopafi mainaya sauve vaya'yagaene kava vaya'yagaene ati vayate kava vaya'yagaene miya'amimo hai-mainea vea'nene tokiya'amima hanea vaya'ene nofipi maine'ya miya o'ali ali'ya ne'aliya vea'nene amakai'ami ali'ya'amile nemaiya vea'nene tusi'a amama'yo aige'ya “Hanate maisune.” hu'ya hute'ya yafakapi'ene ago'yafi hanea ala yafakefamo akavelega fale'ya mo falaki'ya mainae. ¹⁶ Fala ki'ya maine'ya keha keha hu'ya muki'a ago'yahe'ene yafafe'ene mage hu'ya hae “Tagaya sauvemo siale mainea kanoa Anumaya Koti aule omaisuna tagesa nehune. Sipi sipi nafa'nemo'a tusi'a hai vai nelategeta koli nehunagi ago'yamogatama kofa hu-lavitama tagaila etama aiso hulateho. ¹⁷ Ala kanolatamogania hanai vai-late'ana kaiyeke hulatesa'a kanamo'a ago falote hianagi'ya hana'a augafa vea'mo'ya anaulela hetigahae?” hu'ya hage'na haenagama falote hisia yana himona kana yapi agete'na havilinoe.

7

Vani hataleti foti fo tauseni'a (144,000) Isaleli vea'mogamina Anumayamo avona hamanile aiga'maema-tene.

¹ Ani kema havite'na agoana fo'a (4) ensole vaya'mo'ya fo'a (4) ma mopamo atupalega heti-maine'ya yasimona atafa hu'ya ali-talako huligeno yasimo'a taga higeno mopafima hanea yamo'ene hagelimo'ene yosayagamo'enena kanage kanagala ohunae. ² Ohage'na agogeno nago ensole kanomo'a yagemo'ma eva'yi nehilegati ea'amo haimu'ma hanea Anumaya Koti'a agai'a vea'mogami humatenea avona aiga'maematesia yana ayapi atafa hulineno ani fo'a (4) ensole vayala mopaene hageli'ene ali haviyama hisaya tokiya'amima amaminea ensole vayafe mage huno ala kegefafiti hamapaiye. ³ “Tamakaya mopaene hageli'ene yosayagaenema ali haviyama hisaya ensole vaya'mogatama ne'ataletama tagava mainegeta tagaya hageteta Anumaya Kotitimo ali'ya vea'mogami hamanilela Anumayamo'ma humatenea avona aiga'mae-matetesunagetama ani ya'yaga ali haviyana hugahae” huno hie. ⁴ Hige'na havugeno huyogino hamanile avoma kae-malenea vea'nea vani hataleti foti fo tauseni'a (144,000) Isaleli vea'nea alu nofipiti alu nofipiti huyogi-malenea ve'nea agoe. ⁵ Yuta nofipiti tuelufu tauseni'a (12,000) vea'nene Lupeni nofipiti tuelufu tauseni'a (12,000) vea'nene Kati nofipiti tuelufu tauseni'a (12,000) vea'nene huyogi-malene. ⁶ Asa nofipiti tuelufu

tauseni'a (12,000) vea'nene Napatalai nofipiti tuelufu tauseni'a (12,000) vea'nene Manase nofipiti tuelufu tauseni'a (12,000) vea'nene huyogi-malene. ⁷ Simioni nofipiti tuelufu tauseni'a (12,000) vea'nene Livai nofipiti tuelufu tauseni'a (12,000) vea'nene Isaka nofipiti tuelufu tauseni'a (12,000) vea'nene huyogi-malene. ⁸ Sepuluni nofipiti tuelufu tauseni'a (12,000) vea'nene Yosefe nofipiti tuelufu tauseni'a (12,000) vea'nene Penisamini nofipiti tuelufu tauseni'a (12,000) vea'nene huyogi-malene.

Kasago'ya vea'mo'ya Anumaya Koti agia alisaga humainae.

⁹ Kasago'ya vea'nea ohavunama'a vea'nea alu kotega alu kotega vea'nene, alu make alu make ne'aiya vea'nene, alu amaugafa lu amaugafa kalimainea vea'nene, muki'a Anumaya Koti sauve kanomo siamo aulegaene Sipi sipi nafa'nemo aulegaene heti-maine'ya efe kena aya'aya kena'amia failine'ya fa'nofamo haisa amayapi atafa huli huli hulinae. ¹⁰ Hu-line'ya ala kegefafiti mage hu'ya hae “Sauve kanomo siale mainea Anumaya Kotitimo'ene Sipi sipi nafa'nemo'ene tagu tamema ago aligati-mainea yamona aepa'a maina'e.” hu'ya hae. ¹¹ Nehage'ya muki'a ensole vea'mo'ya heti'ya Anumaya Koti'ma mainea siale'ene tueti fo'a (24) kava vaya'mo'yaene fo'a (4) hamaimu'ene anaga'mo'yaene maigagi'ya maine'ya muki'amo'ya ani siale ape hu'ya Anumaya Koti agia alisaga nehu'ya mage hu'ya hae.

12 “Tamage Anumaya Koti'a muki'a muse hisia yana alisie. Tokiya'age hale yama'aene agia haneanagino kanale havi havi'yama'a hanea kano maineafe agia alisaga nehuta tusi'a muse hutesune. Agai'a kava yagaisia tokiya'amo'a agola hanege hanege huno hanesie. Tamage.” hu'ya humainae.

Ani anaga'mogamina amakatama ne'aiya yamo'a menia agola ha'no hie.

13 Ani kea hu ne'atageno nagola ala kava kanomo'a nagaijena mage huno nahavige “Nama aya'aya efe kenama fai-linaya veala ta'yae? Hanategati emainae?” huno nahavige-maine.

14 Nahavigege'na nagaya, Yoni'na, mage hu'na hue “Museka'a nehugi kagaya kagaika'a havilinnane.” hu'na hugeno nagaijena mage huno hie “Mani vea'mo'ya tusi'a kana yama hanea kanafi maine'ya tokiya'age hu'ya kefo ya'amihema havi'ya fali-mainea Sipi sipi nafa'nemo kolateti kena'amia agola sese hageno efe'age humaineanagi'ya emainae. 15 Ani yafe amakaya Anumaya Koti'ma mainea siamo aulega hetimaine'ya felugaene kege'ene agai agia alisaga nehu'ya agai ali'ya ne'aliyanagino Anumaya Koti'a au vaimateno kava yagaimategahie.

16 Yagai-mateneanagino nago'ene amakala ote-gahie. Tifena o'amakegahie. Yagemo'a amukonako huno amaleno o'amasagaligahie. 17 Sipi sipi nafa'nemo'a Anumaya Koti mainea siamona aulega hanea amu'nopi hetino maineno sipi sipi kava kano'ami maineanagino kapai'ma nehagea tima hanea komulega amavaleno mo

matenage'ya maige maige hisaya tina nene-sageno Anumaya Koti'a amaunua alino ha'mi-matesige'ya nago'ene avia o'ategahae.” huno hige'na nagaya Yoni'na havimainoe.

8

Sipi sipi nafa'nemo'a sevenia (7) molia menimo fukiteti aye ka'mae-malenea fukina ali hakao humaine.

¹ Ani Sipi sipi nafa'nemo'a haenagalafana menimo fukiteti aye ka'mae-malenea yana melino hakao hige'na agogeno muki'a ikapinagama hanea yamo'a kanage kanagela ohu'ya muki'a yamo'a kea ohigeno vani'agi hafu aovamo'a eumaine. ² Eutege'na anile agoana seveni'a (7) ensole vea'mo'ya Anumaya Koti aule heti'ya mainageno seveni'a (7) ufena amamige'na age-mainoe.

³ Agogeno nago ensole kanomo'a nagola kanileta yafateti talo hu-malenea yopa ayapi ali-linegeno afuma he'ya folamole kae salamana hu'ya nemalaya folamo kana folamole* heti-mainegeno kasago'ya mana'age nehia ta'nefamo halinamo'ene Yisasina amaku'a aminaya vea'mo'ya nunamuma hu'ya havigaya nunamu'ene ani yopafina ali malesigeno ailokaeno'ma haisiana Anumayamo'a kanale mana'a havisiafene huno sauve kanomo siamo aulega kanileta yafateti talo humalenea folamo hanea folamole mo malene.

⁴ Momalegeno ani mana'age halinamo'ene Anumaymona amaku'ama aminaya vea'mogami nunamu'yagaene ani ensole kanomo ayapitila

atale'ya Anumayamo aule haimainae. ⁵ Haigeno ani ensole kanomo'a kanileta yafateti talo humale yopa alino folamole atama nelea ata ani yopafi maleno havateteno alino ani ata ikapinagati ma mopafi haga'yu hu-talegeno elavigeno ikapinagatila akali kalu huno aulumayala ne'aligeno nagola ala agegefa ne'aigeno imila ali-maine.

Fo'a (4) ensole vaya'mo'ya ufena humainae.

⁶ Seveni'a (7) ufema atafa hu-linaya ensole vaya'mo'ya ani ufema hisaya yafe talo tala humainae. ⁷ Hagote ensole kanomo'a agai'a ufena higeno ko'mopamo'ene atamo'ene kolamo'ene atagufe-lavino mopafi tavigeno muki'a ma mopa tagufale (3) ali fako hu-malageno anifiti nagoke'ma ali fako hu-malaya haupa kaiyaga muki'a mopafi hanea ya'ene muki'a yosayagaene muki'a ape'ene atamo'a teno asagali-talene.

⁸ Asagali-talegeno tu (2) molia ensole kanomo'a agai'a ufena higeno ala ago'ya kana yana ata nelegeno hagelipi tavi-maine. Ani hagelimona tagufale (3) ali fako hu-malageno anifiti nago haupa kaiyaga hanea timo'a kolama'age huno vali vali humaine. ⁹ Kolamo'a vali vali higeno ani haupa kaiyagama mainaya noyameyagaene tipi yagaene fali ha'no hageno ani haupa kaiyagama hanea tipi kaleyaga ali haviya hutalageno anifima mainaya veala fali ha'no humainae. ¹⁰⁻¹¹ Faligeno tali (3) molia ensole kanomo'a agai'a ufena nehigeno ka'nefila ala ka'nefekefamo agia “Atu'age nehuno satu'age ka'nefile.” hu'ya nehayanagino'a ka'ni'moma

nelea avamete huno ikapinagatila elavia'amo muki'a ma mopamona tagufafi (3) melino fako hu-malageno anifiti nago haupa kaiyagama hanea ti'yagaene tima kapai'ma nehagea ti komufi hanea timo'ene atu'age hige'ya muki'a ani lima ne-mainaya vea'nea fali-mainae.

¹² Faligeno fo (4) molia ensole kanomo'a agai'a ufena nehigeno yagemo'a tagufafi (3) ali fako hu-malageno anifiti nago haupa kaiyaga asu humaine. Ani'a hu'ya ikana tagufafi (3) ali fako hu-malageno anifiti nago haupa kaiyaga ani'a huno asu humaine. Ka'nefi'yaga tagufafi (3) ali fako hu-malageno anifiti nago haupa kaiyaga ani'a huno asu humaine. Asu hu-maigeno felugama aye vasa nehia ya'amimo'a tagufafi (3) ali fako hu-malageno anifiti nago kanafina asu higeno kegela tagufafi (3) ali fako hu-malageno anifiti nago kanafina ika'ene ka'nefi'ene asu higeno tusi'a haniki-mainae.

¹³ Nagaya Yoni'na agogeno nagola ala hakiki kana nama ikamo amu'note haleno vige'na age-mainoe. Ne'agogeno ala kegefafiti mage huno hie “Avo'nio avo'nio tagufa (3) ensole anaga'mo'ya ufena nehisageno tusi'a kana yamo'a ma mopafi mainaya vea'mogatamile falote hugahe hige'na tusi'a nahau hu nelamatoe.” huno hige'na havue.

9

Faefu (5) molia ensole kanomo'a agai'a ufena humaine.

¹ Faefu (5) molia ensole kanomo'a agai'a ufena hige'na agogeno nago ka'nefimo'a ikapinagati

atafai-lavino mopafi elavigeno ma mopafina nago komua afe yapi tavi-mainea komumona ayola omale komugefagino ani komumo ki nofila ani ka'nefimona amine. ² Amigeno aliteno ani ki nofiteti ani komua yakigeno ani komufitila tusi'a halinamo huno ehaiyana tusi'a atagefafiti hia halinamo avamete huno ehaiya'amo yagene ika'ene ayesu higeno tusi'a hani kimaine. ³ Kigeno kasago'ya ke'nu kafamo'ya ani halinafitila mopafina aitagu-fetageno vea'ma akafu amanisaya tokiya'amia amamige'ya akafu'ma amani yana kulumale nehaya osifa'vemo'ma ne'amania avamete huno amanige'ya tusi'a amakata aimaine. ⁴ Ani ke'nufena mage huno hie “Ape'ene tala'ya'ene yosayagaenena oneho. Nago'a vea'nege, Anumaya Koti'a hapalimateteno agia hamanilela aiga'mae o'amatenea vea'mogamina akafu amanitama ali haviya humateho. ⁵ Faefu'a (5) ikana amakata aisia yana amamite amamite hugahayanagi hamaege'ya ofaliho.” huno hige'ya akafu amanige'ya amakata yama aliyana kulumale nehaya osifa'vemo'ma vea'ma akafu ne'amania avamete huno amanige'ya tusi'a amakata aimaine. ⁶ Ani yama alisaya kanafina vea'mo'ya falisaya yafena tusiya huno hamaugahianagi ofaligahae. Amakatama aiya yafena tusiya hu'ya falisaya kafena ati yegahayanagi o'agegahae.

⁷ Ani ke'numo'ya tuma hugahema nehaya hosi afumo avamete hu'ya amanutela kanileta yafateti talo humale tumano kula vai-linageno

amaugosamo'a vea'mogami amaugosa kali-maine. ⁸ Kali-maige'ya ani ke'numo'ya aya'aya amayolagefa, haesa a'nemogami amayolagefa kana hu-mainegeni amave'mo'a kave'age laiyoni afumo ave kana humane. ⁹ Humainege'ya hamaifi'yafafina kapaleti talo humale halegu kana yana ano'vai-malene'ya amageko'na agema aiyana tuma hugahe vava hosimo'ya avayu nehaya kalemo nehia kea ala kegefa huno ne'aiya agemo'ma hia kava huno agea aimaine ¹⁰ Ani ke'numo amaigo'yafina aveta'nafa'age neka'ya, kulumale nehaya osifa'vemo akafu ne'amanía ave kana hia neka'ya, hanege'ya ani neka'yaleti faefu'a (5) ikamo agu'afina veala akafu amani'ya ali haviya humategahae. ¹¹ Ani ke'numo sauve kano'amia maineanagino ani kava kano'amimo'a Satani'e, ayo'a omale komugefale kava yagai-maineanagino agia Yuta vea'mogami kea, Hipalu kefina Apatonie hu'ya nehagi Kaliki kefina Apolionie hu'ya nehagi tagaiti kefina mage humane “Vea alino haviya hinage'ya fali ha'no hu-matesia kanoe.” humane.

¹² Ke'numo'ya ali haviya humatesaya kanamo'a ha'no hianagi avo'nio tolea tusi'a kana yatala falote hisa'a yafena nahau hulamatoe.

Sikisi (6) molia ensole kanomo'a ufena humane.

¹³ Sikisi (6) molia ensole kanomo'a agai'a ufena hige'na havugeno Anumaya Koti aule'ma kanileta yafateti talo humale folamomo fo'a (4) atupale hanea avela fo'a (4) avepitila agea

aige'na havimainoe. ¹⁴ Havugeno ufema atafa huline a ensole kano sikisi (6) molia ensole kanomofena mage huno hie “Fo'a (4) ensole vayala, Yufaletisi titegama nofi'ma humatenaya ensole vayala kalu heka amatalege'ya viho.” huno hie. ¹⁵ Higeno “Anumaya Koti'a na kafufina na ikatela na kanafina na aova'a ani fo'a (4) ensole vaya'mo'ya muki'a ma mopafi vea'mogamina tagufafi (3) ali fako humalageno anifiti nago haupa kaiyagama mainesaya veala hamaesagetama faligahae.” huno huteno amatafa hu-lineane. Ani kanamo'a efalote higeno ani ensole vayala kalu heno amatalege'ya ani kavala nehae. ¹⁶ Ani kava'ma nehisa'ge'ya amaya hu'ya hamaesaya ati vaya'amia tu hataleti milioni'a (200,000,000) hosimo agupifi mainaya ati vayala mainae hu'ya hage'na nagaya Yoni'na havimainoe. ¹⁷⁻¹⁸ Havite'na himona kana yapi amakoana ani hosimogami amakupifima mainaya vaya'mo'ya hamaifi'yafafina halegula haesa'ene oko'ene kanileta'ene halegula aye hai-linageno hosimogami amanutela kave'age afua laiyoni afumogami amanu kana hutegen amavayafitila atamo'ene halinamo'ene hi'mana'age atama nelea yafa'yagaene falote huno muki'a ma mopafi vea'mogamina tagufafi (3) ali fako hu-malageno anifiti nago haupa kaiyaga vea'mogamina ani ataene halinamo'ene hi'mana'age atama nelea yafa'yagaleti'ene hamayage'ya fali-mainae. ¹⁹ Hosimogamina hamaesaya tokiya'amia amavayafi'ene amaigo'yafi'ene hanegen amaigo'yamo'a osifa've kana huno akafu amanisia amanuna

hanege'ya veala akafu amanige'ya hamae-mainae.

²⁰ Anima tusiya huno ali haviya hia yamo'ma ohamaenea vea'mo'ya agayanagi kefo yama humainaya yafena amaku'a aiyahae nohae. Kanileta yafateti'ene siliva yafateti'ene haesa yafateti'ene afa yafateti'ene yosaleti'ene talo hu-malenaya yafena “Anumayati mainae” hu'ya hayanagi ani ya'yaga amaulaga o'age'ya kea ohavi'ya kama vai o'aye'yama nehaya afa anumayamo-gamiene Kefo Avamu'mogami amakiene alisaga hu'ya “Anumayati mainae.” hu'ya nehaya kavala o'atalenae. ²¹ O'atalene'ya vea'ma hamae nefaliya ya'ene analisama nehaya ya'ene kumaima nehaya ya'ene musufa yama hu-lite'ya nehaya ya'enefena amaku'a aiyahae nohae.

10

Ensole kanomo'a avoma kaemale omana Yonina amigeno nemaine.

¹ Anile nagaya Yoni'na agoana nagola tokiya'age ensole kanoa ikapinagati elavino ege'na age-mainoe. Ani ensole kanomo augafamona sia'mo'a alino ano'vai-tegeno anutela fulagenam'o'a maleno kagi-mainegeno augosamo'a yagemo'ma hia kava huno aivasa nehigeno tole aiyamo'a ata anefe'mo nehia tunage yosa kana nehigeno emaine. ² Ege'na agogeno nagola osi avona ayapi hanegeno tamaga aiyamo'a hagelimo agupile ayegeno haoga aiyamo'a mopafi ayegeno huteno aye hala hale humaine. ³ Humaineno agema aiyana

laiyoni afumo'ma vale vale nehia avamete huno keha keha nehigeno seveni'a (7) akali kalu ko nelino tusiya huno monagemo'a humaine. ⁴ Seveni'a (7) akali kaluma hia kea havite'na avopi ago kaegahe huanagi ikapinagati nago kea falote huno mage huno hige'na havue “Seveni'a (7) akali kaluma hia kea avopina okaeka falakilio.” huno hige'na havue.

⁵ Havugeno timo agupile'ene mopafi'enema aiya aye hala halema hu-mainege'na agoa ensole kanomo'a tamaga ayana ikate alisaga hie. ⁶⁻⁷ Huteno mage hie “Haimu'ene kanogino Anumaya Koti'a muki'a kanafina maige maige huno ika'ene ikapinaga hanea ya'ene mopaene mopafima hanea ya'ene hageli'ene hagelipima hanea ya'yagaene talo hu-malenea kanomo agile tamage nehue. Anumaya Koti'a nago'ene agava omaigahigi seveni (7) molia ensole kanomo'a agai'a ufena hugahe nehinageno Anumaya Koti'a nayoma falakino hanea kea, agai'a ali'yama alimainaya amaune vaya'ma hamapai-mainea kemo'a falote huno tamage hugahie.” huno hie.

⁸ Hige'na hagoteno ikapinagati'ma hige'na havua kemo'a eteno nago'ene mage huno hie “Hagelimo agupile'ene mopafi'ene aiyama aye hala hale huno heti-maiya ensole kanomo ayapima hanea ali vakaye-linea avona kagaya molio.” huno hie. ⁹ Hige'na ani ensole kanomote vua'amo'na mage hu'na hue “Kagaya ani osi avo omana namio.” hu'na hugeno mage huno nahapaiye “Kagaya alika no. Nesanana kavayafina tumemo timo'ma hia kava huno haga'age hugahianagi nakaisanana kaipafinaga

atu'age hugahie.” huno hie. ¹⁰ Hige'na ani osi avona ensole kanomo ayapiti ali'na nogeno navayafinaga tumemo timo'ma hia avamete huno haga'age hianagi ne'nama nakauvana naipafinaga atu'age humaine.

¹¹ Hige'ya Yoninia mage hu'ya nahapaiye “Kagaya nago'ene alu amaugafa kalimai vea'nene, alu kote kote mainaya vea'nene, alu make lu make ne'aiya vea'nene ala sauve vea'nenefena kaune kea laga huka hamapaigane.” huno nahapaiye.

11

Tole kanolatamo-gania Anumayamo kea huhale'ana hu-maina'e.

¹ Nago kanomo'a male'na agege gege hisua ayopa kana ka'yona namiteno mage hie “Kagaya hetika Anumaya Koti mono no'ene* kae salamana nehaya folamole'ene mo maleka agege gege huka hapalika ago. Ani nopina Anumaya Koti agima alisaga nehaya veala hapalika ago. ² Hapaligananagi malagama hanea mopa* maleka agege gege huka ohapalio. Ani kaiyaga Anumaya Koti kema nohavisaya vea'mogami amamineanagi'ya tagufa (3) kafuene sikisi'a (6) ika'ene ani vea'mo'ya Anumaya Koti kumala alu aotage kuma meli haviya hugahae. ³ Nehisage'na nagaya tolea nagai kema huhale'ana hisa'a kanolatana tokiya'nia anamisuge'ana kayavo kena fai-line'ana tagufa (3) kafuene sikisi'a (6) ika'ene nagai kea huhale'ana huga'e.” huno hie.

4 Ani lole kanolatana ma mopafi kava humainea Anumayamo aule heti-maina'ana tole olivi yosa kana hute'ana tole ka'ni kana humaina'e. 5 Nago'a vea'mo'ya ani kanolatana ali haviya hugahema hisageno'a ani kanolatamogani anavayafitila atamo aikalu huno kame vea'ania temasagalisige'ya faligahae. E, anakai'ma ali haviya hunatesaya vea'mo'ya faligahae. 6 Ani lole kanolatamo-gania tokiya'anileti “Kola o'aiyo.” hu'ana hisa'ageno kema huhale'ana hisa'a kanafina kola o'aigahie. Tifema “Kolama'age huo.” hu'ana hisa'ageno'a ani'a hugahie. Anakesama havisa'a kanafina “Tusi'a kana ya'ene kaliene falote huo.” hu'ana hisa'ageno'a ma mopafi veala nago'ene nago'ene hu'ana hamaega'e.

7 Hamaega'anagi Anumaya Koti'ma anaminea kea hu ha'no hutesa'ageno kefo afai afumo'a ayola omaleno afepinaga tavi-mainea komufinagati ehaino me hanaesige'ana faliga'e. 8 Falisa'ageno anaugafamo'a ala kuma'mo kate'ma, Anumaya'animona Yisasina yafaga yosale'ma hae'ya asai-malenaya kuma'mo, yegegate malegahae. Avame kefima hu-male'ya nehaya ala kuma'mo agia Sotomuene Isipienene hu'ya nehae. 9 Falisa'a anaugafa yegegate tagufa (3) kanaene ani kanamo yagemo'a amu'note ene'vige'ya nago'a vea'nea alu kote kote vea'nene, alu make lu make ne'aiya vea'nene, alu maugafa lu maugafa kalimai vea'neyagaene, ani kanolatamo-gani anaugafa ageme-geme vayanagi nago'a vea'mo'ya ali'ya

hevainategahe hayanagi ani vea'mo'ya “A'ao.” hu'ya hage'ya ali'ya hevai o'ananenae. ¹⁰ Hevai o'ananenagi ani kanolatamogania muki'a kotega vea'ma tusiya hu'ana ali haviyama hu ne'amata'a kanolatama fali'a yafenagi'ya tusiya hu'ya musena nehu'ya muse yana amafalu'amimo-gamina momami memami hugahae. ¹¹ Hugahagi tagufa (3) kanaene ani kanamo yagemo'a amu'note evia kanamo'a ha'no hutegeni Anumaya Koti'a ani kanolatamogani anaugafafi hanaimula huvainatege'ana ani kanolatana ete'ana heti'age'ya muki'a vea'mo'ya ani yana agageno amama'yoya aige'ya kolia humainae. ¹² Koli nehu'ya haviyana ikapinagati ala kegefafiti ani kanolatafena mage huno hie “Tanakaya ehaitana e'o.” huno hige'ya kame vea'animo'ya age-mainage'ana siapi hai-fale'ana ikapinaga hai-maina'e. ¹³ Hai-maina'a anayufina tusi'a imila aliteno ani ala kumakefa teni'afi (10) ali fako hu-malageno anifiti ani imi'mo'a nago kaiyaga ali haviya higeno seveni tausen'a vea'ne (7,000) hamaege'ya fali ha'no humaine. Na'a hu-mainayafe ofali'yama afa'a mainaya vea'mo'ya tusi'a koli hute'ya ikapinagama mainea Anumaya Koti agia alisaga humainae.

¹⁴ Tole kana yana ago ha'no hianagi avo'nio nago'ke kana yana aupa kanafi falote hugahe hige'na nahau hu nelamatoe.

Seveni (7) molia ensole kanomo'a ufena humaine.

¹⁵ Anile seveni (7) molia ensole kanomo'a agai'a ufena hige'na havugenon ikapinagati nago'a vea'mo'ya ala kegefafiti mage hu'ya

humainae “Anumaya Koti'ene taugafama aligatisiafene huno hutenea kanoene ma mopafi kava vea'mogamina ago amakasa'age'ya anaiyafinaga mainayanagino Anumaya Koti'a agola maige maige huno kava yagaigahie.” hu'ya humainae. ¹⁶ Anile Anumaya Koti aule hanea siale'ma mainaya vayala tueti fo'a (24) kava vaya'mo'ya mopafi asaga hu-lavi'ya amako'ya ye-maine'ya Anumaya Koti agia alisaga hu'ya mage hae

¹⁷ “Vae Anumaya Kotigae tusi'a tokiyaka'a haneanagika nayona mainananagika menia mainananagika tusi'a tokiyakaleti aepa heka muki'a yatela kava ne'yagaina yafe tagaya kagaifena tusi'a museka'a nehune. ¹⁸ Kagai kema nohavia vea'mo'ya kagaifena amaipa kafa henegatayafe kagaya kaipa kafa hemateka muki'a fali-mainaya vea'nema kaiyeke humateka kefo ya'amimo anona'amia amamisana kanamo'a ago falote humaine. Ani kanafina kagai kema havi'ya amakupi malenaya vea'nene kagai amaune vea'nene muki'a kagai kagima alisaga hu'ya kaiyafinagama nemaiya vea'nene ala amakima hanea vea'nene osi amakima hanea vea'nene kanale anona ya'amia amamigane. Amamiteka nago'a vea'mo'ya ma mopafi vea'mogamima ali haviya hune'amataya vea'mogamina kefo ya'amimo anona'amia kagaya ali haviya humategane.” hu'ya humainae.

¹⁹ Hageno Anumaya Koti nona ikapinaga hanea

mono nona yaki-talageno Anumaya Koti'ma alino hagelafimatenea kema hanea pokisia ani mono nopina fufu yate hanege'ya ne'agageno anile ala agegefa ne'aigeno monagemo'a tusiya nehigeno imila ne'aligeno ko'mopamo'a talagufe-lavino aimaine.

12

Yoni'a nago a'ene ala osifa'vene age-maine.

¹ Nagola tusi'a tokiya'age avame yana ikapinaga falote hie. Nago a'mo'a mainegeni kena'amo'a yege aumona ayeno au'vai-maigeno ikamo'a aiyafinaga hanegeni anutela tuelfufu'a (12) ka'nefimo'ya tumano ku kana huno vai-line.

² Ani a'mo'a aipaene maineni inamu ya alitegeni agata aigeno avovo humane.

³ Nehigeni nagola tokiya'age avame yana ikapinaga falote hie. Nagola tusi'a haesa osifa've mainegeni seveni'a (7) anuna hanegeni teni'a (10) ave'yaga anu'yagafina hanegeni seveni'a (7) ala sauve kanomo tumano ku'yaga ani avetela vai-line.

⁴ Ani osifa'vemo'a ikate'ma hanea ka'nefi'yaga tagufafi (3) ali fako hu-malageni anifiti nago haupa kaiyaga ka'nefi'yaga aigo'yaleti aye tafai-talageni mopafi elavi-mainegeni ani osifa'vemo'a a'mo aule hetino nafa'ne'ama ne'atesiana ani havi osifa'vemo'a haeno nesiafene huno agava maine. ⁵ Mainegeni ani a'mo'a ne nafa'nema ne'ateana ani nafanemo'a haenaga ala kano maiteno aeni ayopa'a ali-lineno muki'a ma mopafi veate tokiya'age huno kava yagaisia

nafa'nema ne'ateana ani nafa'nea aupa'a hafale'ya avalesaga hu'ya anafinaga Anumaya Koti siale atena. ⁶ Atageno ani a'mo'a nafa'nema ateteno'a faleno vigeno Anumaya Koti'a maisia kumala talo tala hutegeni ka'me kotega via'amo tagufa (3) kafuene sikisi'a (6) ika'ene Anumaya Koti'a yagaitene.

⁷ Na'a higeno ikatela tusi'a tua falote humaine. Ensolemo-gami kava kano'amimo agia Maikoloe ensole vaya'yagaene tokae'ya havi osifa'vene agai'a Kefo Avamu'yagaene tusi'a tua humainae. ⁸ Tuma hayanagi havi osifa'vemo tokiya'a omalege'ya asaga hu-mainage'ya avale'ya ikapinagati avale'ya haga'yu hu-talegeno nago'ene anile omaigahie. ⁹ Ani nayoma nemaiya ala osifa'vemo agia Satani'e nehaya kanomo'a ma mopafi veafena havigege'ya huno ayemavataga hugeno omai kanoene agai'a avamu'yagaene ikapinagatila amavale'ya haga'yu humatalage'ya ma mopafina elavi-mainae.

¹⁰ Elavi-mainage'na havugen o ikapinaga ala kegefafiti mage huno hie "Anima avale'ya haga'yu hu-talaya kanomo'a tafu-tagana-gamina muki'a kanafina humatege humatege huno mage hie 'Ani kefo yana nehae.' huno Anumaya Koti aufima hufalote nehia kanomona ikapinagatila ago avale'ya haga'yu hu-talenaya yafe Anumayatimo'a tagu tamema aligatisia yamo'a ago falote humaine. Anumaya Koti'a agai'a tokiya'a muki'a vea'nea ago amaveliteno agaya ala sauve kava kano maine. Maineanagino agai'a tamaugafa aligatisiafene

huno hutenea kanomo kava yagaisia tokiya'a hane. ¹¹ Haneanagino Satani'a tafu-tagana-gamifena 'Na'a kefo yana nehae.' huno ali falotela hianagi tafu-tagana'ya Yisasi'a, Sipi sipi nafa'nemo kolamo'ma tavi-mainea kene Anumaya Koti kemo'ene huhale'ya humainaya yateti Satanina agase-mainayanagi amakai'ami amaugafahena amakesa ohavi'ya falisaya yafe kolia nohae. ¹² Na'a humainaya yafe ikamogaene ikapinaga mainaya vea'nene musena hiho. Musena hugahayanagi Satanina ikapinagatila avale'ya haga'yu hu-talageno ma mopafina elavi-mainegeneno 'Aupa kana kano'a maigahue.' huno agesa havimainea yafenagino aipamo'a ata neleanagi'na avo'nio ma mopafi'ene hagelipi'ene mainaya ya'yagahena nahau hugi ka'yeho.”

¹³ Ala osifa'vea ago avaleno haga'yu hu-talageno ma mopafi elavino'ma emainea yana ageteno ani ne nafa'nema atenea a'mona ali haviya hutesia yafe mo nati-mainea. ¹⁴ Mo natianagi Anumaya Koti'a ani a'mona aluga aluga haopalega ala hakikimo ageko'na talo huno ategeneno ani a'mo'a haleno ka'me kotega, Anumaya Koti'a talo tala humalenea kumate umainegeneno Anumaya Koti'a tagufa (3) kafuene sikisi'a (6) ika'ene yagai-mainegeneno ani havi osifa'vemo'a ali haviya hutesia tokiya'a omalene. ¹⁵ Omaleneno ani osifa'vemo'a avayafitila muvali-talageno tavia timo'a tusi'a ti hogino aiyayeno lavialamo ani a'mona asaga huno nakaino ali haviya hisie huno ani kavala humaine. ¹⁶ Na'a hianagi ani a'mona aya hisia yafe

mopamo'a eko alino avaya aka hu-mainegeni ani osifa'vemo avayafiti'ma lavia timo'a ani eko kapi tavi fale ha'no humane. ¹⁷ Tavi ha'no hianagi ani osifa'vemo'a a'mofena aipa kafa heteteno ani a'mo aginagomo'yaene tua hugahe umaine. Ani vea'mo'ya Anumaya Koti kahegi kema havi'ya akave'ma nemale'ya Yisasi humanea kema atafa hu-linya vea'nene tua hugahe umaine. ¹⁸ Ani osifa'vemo'a hagelimo agegayalega hetino maine.

13

Tole kefo afai afulatana va'yi humane'a.

¹ Osifa'vemo'a hagelimo agegayalega hetino mainege'na nagaya Yoni'na agogeno nagola kefo afai afua hage lipiti va'yi hige'na age-mainoe. Ani kefo afai afumo anumo'a seveni'a (7) anu'yaga hanegeni teni'a (10) ave'yagamo anupitila hai-mainegeni ani ave'yagamotela ala sauve kanomo tumano ku'yaga teni'a (10) tumano ku vailine. Ani seveni'a (7) anutela kefo afai afumo agia hanegeni ani agiyagamo'a Anumaya Kotifena kamuge hatage'ya vaite'ya hu-haviya hutaya agiyaga kae-malageno hane.

² Ani kefo afai afumona agoana ma'a humane. Nagola afai pusimo agia lepatie nehaya afu kana huno aiyamo'a nago ala afai kalamo agi'a peamo aiya kana humane. Avayamo'a laiyoni afumo avaya kana hu-mainege'na age-mainoe. Agogeno ani ala osifa'vemo'a agai'a tokiya'aene ala kava hisia sia'aene ani kefo afai afumona amine.

³ Amigeno ani kefo afai afumona nago anuna ago hae-malenaya falitesea afugula haneanagi amuna ageno ago eteno kanale hutene. Kanale

hutege'ya agete'ya muki'a ma mopafi vea'mo'ya agete'ya amama'yo aige'ya ani kefo afai afumona akave umainae. ⁴ Ala osifa'vemo'a agai'a tokiya kefo afai afumona aminea yafe muki'a vea'mo'ya ani kefo afai afumofena “Alati maine.” hu'ya agia alisaga humainae. Kefo afai afumo agiene alisaga nehu'ya mage hu'ya hae “Hana kanomo'a kefo afai afumo tokiya'amo'ma hia kavala huno hugahie? Ta agai'enema tuma hisia tokiya'a hane?” hu'ya hae.

⁵ Hageno Anumaya Koti'a mage huno hie “Atalegeno tagufa (3) kafuene sikisi'a (6) ika'ene kava yagaino.” huno higeno ani kefo afai afumo'a agai'a agia alisaga huno Anumaya Kotifena tusiya huno kamugea hatageno vaitene. ⁶ Ani kefo afai afumo'a avaya aka-naka huno Anumaya Kotina kamugea hu ne'ateno Anumaya Koti agiene nemaiya kuma'aene ikapinagama mainaya vea'aenena hu-haviya humatene. ⁷ Hu ne'amategeno Anumaya Koti'a atalegeno Yisasina amaku'a aminaya vea'nene tua huno amakaseteno muki'a alu kote alu kote vea'nene, alu make lu make ne'aiya vea'nene, alu maugafa lu maugafa kalimai vea'nene, kava humatesia tokiya amigeno kava yagaino maine.

⁸ Kava yagai-maineanagi'ya muki'a ma mopafi vea'mo'yama agia alisaga hugahayanagi maige maige hisaya hamaimu'ma hanea vea'mogami amakima hanea avopi amaki kae-malenea vea'mo'ya agia alisaga ohugahae. Ani avona Anumaya Koti'a ma mopama taloma ohunea kanafina mage huno hu-maineanae “Nagai Sipi sipi nafa'nea, Yisasi'a, faligahie.” huno hutenea

kanomo avone.

⁹ Nagi tamakesama hanesimo-gatama mani kea havilama hutama hiho. ¹⁰ Anumaya Koti'a "E." huno hisige'ya nago'a vea'mo'ya kina nopina ugahae Anumaya Koti'a "Naepe ka'yoteti haetama falimato." huno hisige'ya nago'a vea'mo'ya naepeleti falilamategahae. Ani au'ava yamo'ma falote hisigetama Anumaya Koti kea havi'ya amakupi'ma malenaya vea'mogatama tokiya vaitama mani kea ali lokiya vaitama atafa hu-litama maiho.

¹¹ Nagaya Yoni'na agogeno nago kefo afai afumo'a* mopamo agusafiti eva'yi humaine. Ani kefo afai afumo anupina tole avela, sipi sipi nafa'nemo ave kana ave haneanagi agema aiyana tusi'a puku pukumo age kana huno agea aimaine. ¹² Ne'aigeno hagote kefo afai afumo'a tokiya'a amigeno ani himamuleti muki'a ma mopafi vea'mogamitela kava humaineno anima nago kefo afai afumo'a muki'a ma mopafi mainaya vea'mogamifena mage huno hie "Hagote kefo afai afumona anupina hae'ya falitesaya kava hageno amuna ale-maineanagino eteno kanale hutenea afumo agia alisaga hiho." huno humaine. ¹³ Nehuno anima nago kefo afai afumo'a muki'a alu'a augafa tokiya'age avame yana nehuno atamofena "Ikapinagati elavio." huno'ma hiana vea'mo'ya ne'agageno atamo'a ikapinagati mopafina elavi-mainaine. ¹⁴ Elavigeno hagote kefo afai afumo'a "Na'a huo." huno tokiya amigeno nago afai afumo'a tokiya avame yama nehia yateti veala aye mavataga hia'amo ani veafena mage huno humaine "Tamakaya

hagote kefo afai afua, naepeleti honomu ayageno faliteno eteno mainea afumo agia alisaga hisaya yafe yosaleti avame'name hutama amena talo hiho.” huno humaine. ¹⁵ Hige'ya taloma hayana Anumaya Koti'a atalege'ya nago kefo afai afumo amena yosaleti talo humalaya kefo afai afumo amela haimula amigeno aepa heno nago'a vea'mo'ya agai agima alisaga nohageno haege'ya fali-maine. ¹⁶ Ani kefo afai afumo'a mage huno hie “Muki'a vea'mogamina, amakima omale vea'nene, amakima hanea vea'nene, miya'ami hanea vea'nene, miya'amima omale vea'nene, nofipi maine'ya miya o'ali ali'ya ne'aliya vea'nene, amakai'ami miya alisaya ali'yama ne'aliya vea'nene tamaga amayatelo hamanilelo ohananesia avona kaemateho.” huno hige'ya kasago'ya vea'mo-gamina ani avomo'a hamanileti kae-male kae-male humaine. ¹⁷ Hige'ya ani avona hagote kefo afai afumo agio ifi ani agimo napamao amaugafale'ma ani alegana yama omalenesaya vea'mo'ya nago yana alu vea'neletila miya ohige'ya amakai'ami yana alu vea'mo'ya miya ohugahae.

¹⁸ Nago'a vea'ma kanale havi havi'ya'ami hanea vea'mo'ya ani hagote kefo afai afumo napama'a hapali'ya havilama hisae. Ani napana nago kanomo agimo napama'a hane. Ani agimo napana sikisi hataleti sikisiti sikisi'a (666) napama'a hane.

14

Kasago'ya Sipi sipi nafa'nemo vea'mo'ya haegafa yagame humainae.

¹ Nagaya Yoni'na agogeno Anumaya Koti Sipi sipi nafa'nea Saiyoni* ago'yale hetino mainege'ya kasago'ya vea'mo'ya vani hataleti foti fo tauseni'a (144,000) vea'mo'ya agai'enena ani ago'yale heti'ya mainae. Ani vea'mogami hamanilela Sipi sipi nafa'nemo agiene agai'a Nefa agiene kae-malena. ² Nagaya ikapinagati kanale age aiya agea havugeno ti anamo'ma asaga hu-lavino nelavino agema ne'aiya kava huno ne'aino monagemo'ma hia kava hige'na havimainogeno kasago'ya vea'mo'ya gitama ne'aigeno agema ne'aiya kava hige'na havimainoe. ³ Havuge'ya ani vea'mo'ya Anumaya Koti'ma mainea siamo aule'ene fo'a (4) hamaimu'ene anaga'mo-gami amaule'ene kava vaya'mo-gami amaule'ene heti'ya maine'ya haya yagamea nago'a vea'mo'ya ohavinaya yagamea, haegafa yagame humainae. Ani yagame haya vea'nea ma mopafi mainageno Anumaya Koti'a amaku amamema aligati-mainea veala vani hataleti foti fo tauseni'a (144,000) vea'mo'ya amakai'amige ani yagame havimainae. ⁴ Ani vea'mo'ya a'nea amavayu hu'ya ofaeyageno amaku'amo'a oni'ya'agela ohigeno Sipi sipi nafa'nemo'a vai ne'yage'ya ani vea'amo'ya akavela vai ne'ayaye. Anumaya Koti Sipi sipi nafa'nemo'a faliteno kefo ya'amimo aigagimatenea yapiti miya humateteno ma mopafi vea'mogami amu'nopiti hageteno amaugafa aligati-mainegeno Anumaya Kotite'ene Sipi sipi nafa'nemote'ene amavaleno amate-maineane. ⁵ Amatege'ya ani vea'mo'ya havige ohu vealagi'ya nago'a kefo'amia

omaleneane.

Tagufa (3) ensole vaya'mo'ya kanale kea huhale'ya humainae.

⁶ Nagaya agoana nago ensole kanomo'a ika'mo amu'note haleno vai ne'ayeno agola hanege hanege huno nehanea kanale mono kea alino muki'a ma mopafi mainaya vea'mogamina alu kote alu kote vea'nene, alu make lu make ne'aiya vea'nene, alu maugafa lu maugafa kalimainea vea'nene hamapaisia yafe vai ne'aye. ⁷ Vai-yeno ala kegefafiti mage huno hie “Anumaya Koti'a vea'mogami alino kaiyekema humate-sia kanamo'a ago falote hu-mainegi tamakaya koli nehutama Anumaya Koti agia alisaga hiho. Anumaya Koti'a ika'ene mopaene hageli'ene mopafiti'ma kapai nehagea ti'ene agai'a talo humalegetama agai agia alisaga hiho.” huno humaine.

⁸ Hume hume ne'vigeno akavelega nago ensole kanomo'a ne'eno mage huno humaine “Ala kumala Papiloni* kumala tusiya hu'ya ago ali'ya tagape aitalae. Papiloni vea'mo'ya muki'a kotega veafena mage hu'ya humainae ‘Tagayama huna kava hutama kumai yana haga'age huno havili kana humainegi afa'a neho.’ hu'ya hage'ya ani kumai yana mai'ya humainae.”

⁹⁻¹⁰ Ani lole ensole kanola'mogani anakavela nago ensole kanomo'a ne'eno ala kegefafiti mage huno hie “Nago'a vea'mo'ya kefo afai afuene amayateti avave-name hu'ya talo hu-malenaya ame'ene'ma agima alisagama nehu'ya ‘Ani kanomo agia nayatelo nahanilelo

agia aiga'maelato.' hu'yama hu-mainaya
 vea'mogamina Anumaya Koti'a haima ne'vaiya
 yana aligahae. Anumaya Koti aipamo'a haviya
 hinageno hai vaimateno ata nelenageno atu'age
 huno havili kana higeno takino amamisige'ya
 ani vea'mo'ya ani havilina negahae. Nesayana
 alu aotage ensole vea'mogami amaule'ene Sipi
 sipi nafa'nemo aule'ene hi'mana'age ata nelea
 yafa'yaga hanea atafi mainesageno amaleno
 asagalisige'ya tusiya hu'ya amakata aigahie.

¹¹ Muki'a kanafina ani amakatama aige aige
 hisia atamo halinamo'a taga ohugahianagino
 agola haige haige huno haigahie. Haige'ya ani
 vea'mo'ya kefo afai afule'ene amayateti avame-
 name hu'ya talo hu-malenaya amema'aene
 agia alisaga nehu'yama ani kanomo agima
 amaugafale hanesia vea'mo'ya muki'a kanafina
 agola kege'ene felugaene amaugafa amakata aige
 aige hinage'ya ha'no ohugahie.” huno humaine.

¹² Havisayana tamakaya Yisasina tamaku'ama
 aminaya vea'mogatama Yisasife havitama
 tamakupi malenaya kea atafa hu-linetama
 Anumaya Koti kahegi kema akave maletama
 mailokiya vaitama maiho.

¹³ Nagaya Yoni'na ikapinagati nago kea
 havugenno mage huno hie “Kagaya kea ma'a
 huka kao muki'a Anumayamo'ene ailokae'ya
 nemaiya vea'mo'ya menima aepa he'ya falisaya
 vea'mo'ya tusi'a muse hugahae.” huno humaine.
 Higeno Alu Aotage Avamu'mo'a mage hie “E,
 ali'ya ali-mainaya yana ne'atale'ya maifalu
 hisage'ya kanale kava'ma hu-mainaya yamo'a
 amakai'ene ugahae.” huno humaine.

Anumaya Koti'a ma mopafima afule-mainea kave'ma hataka hisia kanamo'a ago falote humane.

¹⁴ Nagaya agogeno nago efe'age siatela nago vemo'a ikapinagati emainea kanoa vaya'mo atenea kano avamete hia kanoa siate maineno anute kava vaya'mogami tumano kula, kanileta yafateti talo humale tumano kula vaiteno ayapina ave'ne'ne huno fagagi-mainea naepe ka'yona ali-line. ¹⁵ Ali-linegeno nago ensole kanomo'a Anumaya Koti nopiti hati-lavino ne'eno ani siate'ma maiya kanohena ala kegefafiti mage huno hapaiye “Muki'a ma mopafi kave'mo'a afule-mainegeneno ani kave alisuna kana haneanagika kagayama ali-linana naepe fagagi humanea naepe ka'yotetila nesate'ma humanea kavela alio.” huno hie. ¹⁶ Higeno siate'ma maiya kanomo'a fagagi-mainea naepe ka'yotetila muki'a ma mopafima afule-mainea kavela hataga humane.

¹⁷ Nehigeno nago ensole kanomo'a ikapinaga hanea mono nopiti hati-lavino elavia'amo agai'enena ani'a huno tusi'a ka'yona fagagino ave'ne'ne huno naepe ka'yona ali-lino emaine.

¹⁸ Ne'egeneno nago ensole kanoa atale'ma kava nehia kanogino afuma he'ya negaeyaya folamole maineleti ne'ataleno emaine. Ea'amo fagagino ave'ne'nea naepe ka'yoma ali-lia kanomofena ala kegefafiti mage huno hie “Muki'a mopafi nofi alagayagamo'a ago afule-mainefe kagaya ani naepe ka'yoka'a alika ani nofi alagayaga mo hataga huka hala'ya huo.” huno humane.

¹⁹ Higeno ani ensole kanomo'a naepe ka'yoma'a

ali-lino ape huno muki'a mopafima hanea nofi alagayaga hataga huno helafi-lino via'amo vea'mo'ya amaiyaleti'ma aye lata-pageno tima'amo'ma nelavia yafa yopa, Anumaya Koti'a kefo yafena tusiya huno aipa kafa huteno kefo yama nehaya vea'mogamina anona'amima amamisia ala yafa yopafi mo malene. ²⁰ Mo malegeno ala kuma'mona malaga ani nofi alagama aye lata-pegeno'a anima aye latapea kolamo'a tusiya huno lavino lavino lavia'amo timo'a hogino vea'mogami amayo'nale'ma nehaiya avamete huno hogino aya'aya kotega tali hataleti (300) kilomita tavige'na age-mainoe.

15

Seveni'a (7) ensole vaya'mo'ya seveni'a (7) havi yatafa atafa hulinae.

¹ Nagaya Yoni'na nagola tusi'a tokiya'age alegana avame yana ikapinaga falote hige'na agoana ma'a humaine. Seveni'a (7) ensole vaya'mo'ya anile maine'ya seveni'a (7) havi yatafana vea'mogami haenagalafa falote hisia ali haviya humatesia yana atafa hulinae. Anima ali haviya humatesia yana ha'no hisigeno Anumaya Kotina aipamo'ma ata nelea yana agola ha'no hugahie.

² Nagaya agoana nagola hageli kotuna galasi kana huno alave alave nehigeno amu'no'afina ata nelege'na age-mainoe. Ani kotute muki'a

vea'mo'ya “Kefo afai afuene amayateti talo humalenaya amefe'enena agia alisaga ohugahunagi. Agiene napama'aene taugafalega okaegahae.” hu'yama ani afumona agase-mainaya vea'mo'ya ani hagelimo agegayale heti-maine'ya Anumaya Koti'ma amaminea yave'ya atafa huline'ya yagamea humainae. ³ Ani vea'mo'ya Moses'e'a Anumaya Koti ali'ya kanomo yagamene Sipi sipi nafa'nemo yagamene hu'ya ma'a humainae

“Ala Anumaya Kotigae tusi'a tokiyaka'a haneanagika muki'a humainana yamo'a kanale'ya huka talo hanageta tagaya ne'agonageno tama'yoa ne'aiye. Muki'a mopafi vea'mogamina ala sauve kano'ami maineka kava ne'yagaika kagaika'a au'ava yakamo'a tamagelafa huno fatago humaine. ⁴ Ala kanomogae kagaika'age nagoke'moga kefo yana ohuka alu aotage kanoma mainana yafena hana kanomo kagaifena kolika'a ohugahie? Hana kanomo kagai kagia alisaga ohugahie? Muki'a mopafi vea'mo'ya kagaya fatago huka mainana au'ava yaka'a ago age-mainaya yafe kagaitega ea'amo'ya kagia alisaga hugahae.” hu'ya yagamefitila humainae.

⁵ Yagamea nehage'na ikapinaga ete'na agoana mono nopina, kelamagama ali falote nehia nona, alu aotage seli nona yaki-mainege'na age-mainoe. ⁶ Ne'agoge'ya seveni'a (7) ensole vea'mo'ya seveni'a (7) ya'yaga vea'ma ali haviya humatesaya yama atafa hu-linaya en-

sole vaya'mo'ya mono nopitila hati-lavi'ya kumatega emainae. Ani vea'mo'ya oni'ya ohu kenamo'a alave alave huno efe'age humainea kena fai-line'ya kanileta yafateti talo humale nofila amaifi'yafale ayegalaki-line'ya emainae. ⁷ Ageno fo'a (4) hamaimu'ene anaga'mogami amu'nopitila nago kanomo'a ea'amo seveni'a (7) yopa kanileta yafateti talo humale yopayaga ali-lino amamine. Ani yopayagafina Anumaya Koti'a maige maige huno mainea kanomona haima vaigeno aipamo'a atama nelea yana ani yopafina havate-maine. Havate-mainegeno alino seveni'a (7) ensole veala ani yopayaga me mamine. ⁸ Me mamige'ya Anumaya Kotina tokiya hale yama'aene himamu'aene halina kana huno ani mono nopina havate-maine. Havate-maineanagi'ya nago'a vea'mo'ya ani nopinaga hai'ya ofalena. Ofalenayanagi'ya seveni'a (7) ensole vea'mo'ya anima seveni'a (7) ali haviya humatesaya ali'ya'amia ali ha'no hutesage'ya vea'mo'ya ete'ya ani nopinaga hai-falegahae.

16

Anumayamona haima ne'vaiya yana seveni'a (7) yopafiti ali'ya aihelafi-talene.

¹ Na'a hige'na havuana ikapinaga hanea mono nopiti nagola tusi'a agegefa aige'na havugenno seveni'a (7) ensole vayafe mage huno hie “Tamakaya Anumaya Kotina haima vaigeno aipamo'a atama nelea yana seveni'a (7) yopafi hanegi alitama mopafi mo aitagu-feho.” huno hie.

2 Higeno hagote molia ensole kanomo'a via'amo ani yopa'afima hanea yana alino mopafi mo aitagu-fege'ya kefo afai afumo avoma amaugafale'ma kae-malenea vea'mo'ya ani kefo afai afumo amefena “Anumayati mainane.” hu'ya agima alisaga nehaya vea'mogamina tusi'a kele amamu amale-mainae.

3 Amamuna amalege'ya mainageno anile molia ensole kanomo'a yopa'afima hanea yana alino hagelipi mo laki-talegeno ani hagelimo'a falimainaya vea'mogami kolamo'ma hia kava huteno muki'a tipima mainaya kafayaga fali'ya faluti-mainae.

4 Falutigeno anile tagufa (3) molia ensole kanomo'a yopa'afima hanea yana ala tima nelavia tipi'ene kapai'ma nehagea tipi'ene taki-talegeno ani li'yagamo'a kolama'age ti hapae-mainae. 5 Na'a hige'na havugenno tite'ma kava yagai-mainea ensole kanomo'a mage huno hie “Anumaya Kotiga nayona mainananagika menia ani'a huka maineka kefo yana nohana Alu aotage kanogika kaiyekema humateka kefo yamo anona'ama hu-matana yana fatago huka nehane. 6 Ani vea'mo'ya kagaika'a alu aotage vea'nene amaune vea'nekaene hamayage'ya falimainae. Faligeno ani vea'mogami kolamo'ma takilavi-mainea yafe kagaya ani kefo ya'amimo anona'amia ne'amaminanagi'ya ani kola tima nesayana kagaya kanale kava hu ne'matane.” huno humaine. 7 Hige'na havugenno afuma he'ya kae salamanama hu ne'ataya folamoleti nago kemo'a falote huno mage hie “E, tamage muki'a tokiyaka'a hanea Anumaya Kotiga

kaiyekea fatago hulama huka hu ne'amatana kano mainane.” huno humaine.

⁸ Hige'na agogeno anile fo (4) molia ensole kanomo'a yopa'afitila yagefi ailaki-talegeno Anumaya Koti'a atalegeno yagemo'a tusi'a amuko'age huteno muki'a veala teno amasagali-mainae. ⁹ Amasagalige'yagi vea'ma kefo yamo anona'amima amamisia tokiya'ama hanea Anumaya Koti agia aye haviya nehayanagi'ya amaku'a aiyahae hu'ya Anumayamo agia alisaga ohunae.

¹⁰ Ohageno faefu (5) molia ensole kanomo'a yopa'afima hanea yana kefo afai afumo siale taki-talegeno muki'a ani kefo afai afumo'ma kava humatenea kaiyaga tusi'a hani kige'ya agai vea'mo'ya amaugafa amakatama aiya yafe amakai'ami amavefu'nafi hataga hatago hu'ya akafula ani-mainae.

¹¹ Ne'anigeno amaugafale'enena amamuna amaleno amakatama aiya yafena ikapinaga mainea Anumaya Kotifena kamuge hatage'ya vaitayanagi kefo yama humainaya yafena amaku'a aiyahae ohunae.

¹² Aiyahae ohageno sikisi (6) molia ensole kanomo'a yopa'afima hanea yana tusi'a lina Yufaletisi lima nelavia tipi taki-talegeno ani limo'a ta'nenno hau huteno ala kakefa falote humaine. Higeno yagama va'yi nehilegati ala Sauve vaya'ma esaya kamo'a falote humaine.

¹³ Falote hige'na nagaya ne'agogeno tagufa (3) Kefo Avamula utu kana avamula nagola osifa'vemo avayafiti va'yi higeno nagola kefo

afai afumo avayafiti va'yi higeno nagola havigege'yama nehia aune kanomo* avayafiti va'yi humaine. ¹⁴ Va'yi hute'ya ani tali'a (3) Kefo Avamu'mo'ya hai'ya maine'ya tokiya'age avame yana nehu'ya muki'a ma mopafi Sauve vayate'ma vayana ani vayala amavale'ya alitalu humategahe umainae. Tusi'a tokiya'ama hanea Anumaya Koti'a ala tuma hisia kanafina Anumaya Koti'ene tuma hisaya yafe melitalu humatena.

¹⁵ Yisasi'a mage huno humaine “Haviho ‘Omegahie.’ hutama nehaya kanafina musufa kanomo'a ne'ea avamete kava hu'na egahue. Egahuanagi ani kanafina kena'amia omalena'ya alapa'agela maisaya veala amakayea ohisaya yafe menia nagai'fema amakesa nehavi'ya amaula ofae'ya kena'amia fai-lisayana musena hugahae hu'na nehue.” huno humaine.

¹⁶ Utu kana Kefo Avamu'mo'ya muki'a kotegati ala Sauve vea'mogamina amavale'ya aya'amo'ya Yuta vea'mogami kefina Amagetoni hu'ya nehaya kumate melitalu humatene.

¹⁷ Aupa'a seveni (7) molia ensole kanomo'a yopa'afima hanea yana ikate hanea yasifi taki ne'a-talegeno ikapinagama hanea mono nopitila ala kegefa falote huno mage hie “Muki'a yana hai ha'no hie.” huno humaine. ¹⁸ Ani kea nehigeno aulumaya kotino ute ete higeno monagemo'a tusiya huno agea ne'aigeno tusi'a imila ali-maine. Vea'mo'ya ma mopafima mainaya kanafina ani'a augafa imila alige'ya o'agenayanagino muki'a imila agaseno tusi'a imikefa ali-maine. ¹⁹ Aligeno

ala kumala Papilonia* ali haviya huno tagu-fafi (3) ali fako higeno muki'a ma mopafi ala kuma'yagaene alino haviya humatene. Anumaya Koti'a Papilonia ala kumapi maine'ya kefo yama nehaya veafena agela okaninegi agesa havino haima ne'vaiya yamo'a aipafina ata nelegeno kefo ya'amimo anona'amia amamige'ya ali-mainae. ²⁰ Ala imikefa aligeno muki'a hage-limo amu'nopima hanea mopaene ago'yagaene fanane humainae. ²¹ Tusi'a ko'mopa, yafa ku kana huteno, ala alaisi ku kana huno kana'age huno ikapinagati asaga hulavi hulavi hia'amo veamogami amaugafale tavia'amo ali haviya humatege'ya Anumaya Kotifena “Otahaiya kano mainane.” hu'ya kamugea hatage'ya vaitenae.

17

Tusiya huno kumaiya nehia a'mo'a kefo yama'amo anona'a ali-mainae.

¹ Seveni'a (7) yopa atafa hulinaya ensole vayapiti nagoke ensole kanomo'a ea'amo nagaifena mage huno hie “Kagaya male ege'na kavelino. Ma kumai a'mo'a, timona avoyalega ala kumate mainea a'mo'a, kefo yama'amo anona'a alisia yafena nagaya kaveligahue. ² Muki'a ma mopafima mainaya Sauve vava'mo'ya ani kumate mainaya vea'nenena tusiya hu'ya kumaiya he'ya* vai ne'ayage'ya ma mopafima mainaya vea'mo'yaenena ani kumate vea'nenena kefo yama nehaya kava hu'ya havilima ne'ya anegi-nagima nehaya kava humainae.” huno hige'na havi-mainoe.

³ Nehavugeno Alu Aotage Avamu'mo'a nagaila Yoninia tokiya'a namitegeno ani ensole kanomo'a navaleno vea omai ka'me kotega mo natene. Mo natege'na nagaya nago akefa agoana haesa kefo afai afumo agupifi mainege'na age-mainoe. Ani kefo afai afumo augafalela Anumaya Kotina kamugema hatage'ya amakiya agia augafale kae-malena. Ani kefo afai afumona seveni'a (7) anu'yaga hanegeni ani anu'yagalela teni'a (10) ave'yaga hane. ⁴ Hanege'na nagaya agoana ani akefamo'a oko kenaene haesa kenaene fai-lino maine. Miyamo'a hai-mainea seveli'ya'ene kanileta yafateti talo humale ya'ene fai-linegeno augafalela ale'ale nehigeno maiya akefa age-mainoe. Agogeno ayapina kanileta yafateti talo humale ke'ayola ali-linegeno kumai yama nehia ya'ene havigu-nagu hi'mana'age kefo yama'aene ani ke'ayopina havate-maine. ⁵ Ani a'mo hanilela agai'a agia avame kea mage hu'ya kae-malena "Papilonia ala kumate'ma muki'a kumai yama nehaya ya'ene ma mopafima kefo yama nehaya ya'enena ita'amo'e." huno kae-malene. ⁶ Kaege'nama agoana ani a'mo'a muki'a Anumaya Kotina alu aotage vea'nene, Yisasi'ma hulatenea mono kema hamanepaiya vea'nene hamaege'ya falimainaya vea'mogami kolana ani a'mo'a valu valu huno neteno havilima nete'ya aneginagima nehaya kava hige'na agete'na atali talu nehugenoma'yoa aimaine. ⁷ Ne'aigeno ani ensole kanomo'a mage huno hie na'a higeno kama'yoa ne'aiye? Nagaya ani a'mofe'ene

agupifima mainea afua, seveni'a (7) anu'yaga hanegeni ani anu'yagalela teni'a (10) ave'yaga hanea afuenefena falakino hanea kea hu falote hu'na kahapaigahue. ⁸ Agana kefo afai afumo'a nayona maineanagino meni kanafina ago fali-maineanagino haenaga'a ayo'ma omale komufitila hetino ataleno ehaisia'amo hani yapima tegelege nehia atafina agola umaigahie. Umaigahianagi Anumaya Koti'a ma mopa taloma ohunea kanafima hanea avopina, maige maige hisaya hamaimu'ma hanea vea'mogami amakima kae-malenea avopina, ma mopafi mainaya vea'nea amakima okaenea vea'mo'ya ani kefo afai afuma agesayana atali hu'ya tusi'a amama'yo aigahie. Ani afua nayona maineanagino menia ago fali-maineanagino haenaga'a eteno eva'yi hisia afai afue. ⁹ Kanale havi havi'ya'amima hanesia vea'mo'ya mani yafena havilama hu'ya havigahae. Haviho. "Ani kefo afai afumona seveni'a (7) anumo'a seveni'a (7) ago'yale humaleno higeno ani kumai a'mo'a ani ago'yale maine. ¹⁰ Na'a higeno ani anu'yagamo'a seveni'a (7) ala sauve kava vava mainae. Maine'ya ani sauve vayapitila faefu'a (5) ago faligeno nagoke menia mainegeni nagokela yaufa falote ohune. Haenaga eva'yima hisiana osi kana kano'a maigahie. ¹¹ Maigahianagi kefo afai afumo'a nayona maineanagino menia ago fali-mainea afugini eiti (8) molia Sauve kano maineanagino seveni (7) molia Sauve anagapi maineanagino hani yapi visia'amo tege-lege nehia atafi agola umaigahie.

¹² Agana teni'a (10) ave'mo'a teni'a (10) Sauve

vaya maine'ya menia yaufa kava ali'yana o'alinayanagi'ya kefo afai afuene tokiya'ami alite'ya ani kava ali'yana aupa kana kano'afi kava yagaite'ya atalegahae. ¹³ Ani teni'a (10) Sauve vaya'mo'ya nagoke amaku amakesale maine'ya tokiya'amia kefo afai afumona amigahae. ¹⁴ Amite'ya ani Sauve vaya'mo'yaene kefo afai afuene ali nagopi atale'ya Sipi sipi nafa'nenema tuma hisayana Sipi sipi nafa'nemo'a, ala kava vea'mogamina kava'ami maineanagino ala Sauve vea'mogamina ala Sauve kano'ami mainea yafe ani luma hisayana amakaila amakasegahie. 'Nagaitega eho.' huno'ma huyogi-malenea vea'mo'ya muki'a kanafina efi efi hu'ya agai kema akave nemalaya vea'nene Sipi sipi nafa'nene ailokae'ya maine'ya ani luma hisayana amakasegahae." huno ani ensole kanomo'a hige'na havimainoe.

¹⁵ Havugeno mage huno nahapaiye "Agana ti'yaga, kumai a'mo'a ani ti avoyale'ma mopale mainea timo'a, veafe humaine. Kasago'ya vea'mo'ya alu kote alu kote vea'nene, alu make lu make ne'aiya vea'nene, alu maugafa lu maugafa kali-mai vea'nene elitalu hu'ya maine. ¹⁶ Anima teni'a (10) ave'yagama hanegeka agana teni'a (10) Sauve vaya'mo'yaene ani kefo afai afuene ali nagopi atale'ya ani kumai a'mona amaipa kafa hutete'ya ali haviya hutegahae. Hute'ya aluya hu'ya tua hutete'ya kena'a augafaletila hate-talete'ya augafa alaga'age mainesige'ya augafamona ame'a nete'ya atafi kae-talegahae. ¹⁷ E, Anumaya Koti'a agai'ama humainea kemo'a

tamage huno falote hisiafene huno ani amaku amakesa teni'a (10) Sauve vaya'mogamina amaminege'ya nagoke amakesage'ya havite'ya 'Ala kava kano maisie.' hu'ya ani kefo afai afumona tokiya'amia amina. Amigeno kavama maisia yama'a hanesigeno Anumaya Koti'a hamapai-mainea kemo'ma falote huno tamagama hisia kana ani kefo afai afumo'a ha'no hugahie.

¹⁸ Ani akefa aganana tusi'a ala kava yagai-mainea kumala, muki'a Sauve vaya'mogamina ago amakaseno hai-mainea kumafe nehie." huno hige'na havimainoe.

18

Papiloni kuma'mo'a ago haviya humaine.

¹ Ikapinagati nago ensole kanoa elavige'na nagaya Yoni'na agogeno ani ensole kanomo'a tusi'a tokiya'a hanegenon elavino'ma eana yagemo'ma aivasa nehia avamete huno konagali yama'amo'a mopamona aivasa humaine. ² Humalegenon ani ensole kanomo'a ala kegefafiti mage huno hie "Papilonia ala kumakefamo'a tusiya huno ago haviya hu-mainege'ya menia Kefo Avamu'yagaene nago'a fali-mai afuyaga aye laga-fe'ya ne'vaiya namayagaene ani kumapina ali vai-mainae. ³ Ani Papiloni vea'mo'ya muki'a kotega veafena "Tagayama nehuna kava hutama kumaima he au'ava yamo'a haga'age ti kana hu-mainegi neho." hu'ya hage'ya ani kava'ma haya yamo ani kumala agola ali haviya humaine. Muki'a ma mopafi Sauve vaya'ene ani'a hu'ya

agai'ene kumai yana hu-mainayagi'ya ma mopafi miyana tusi'a miya alisaya ali'ya ne'aliya vea'mo'ya tusiya hu'ya kumai yana hu-lite'ya haya yateti ala miyakefa ali-mainaya yafe ani kumala agola ali haviya hu-talenae.” huno humaine.

⁴ Nagaya havugeno nago kemo'a ikapinagati mage huno humaine “Muki'a vea'nimogatama ani kumapitila ne'ataletama hati-lavitama malaga eviho. Havigu nagopi tamakaya afalu falu hutama mainesageno ani vea'mogami kefo ya'amimo'ene huyafenagi ailokaetama ani vea'mogami kefo yamo anona'ami aliyafenagi hati-lavitama eviho.

⁵ Ani vea'mo'yama humainaya kefo ya'amimo'a ala itugefamo'ma hia kava huno maleme maleme ikapi nehaiyanagino Anumaya Koti'a muki'a ani kumate vea'mo'yama hu-mainaya kefo yafena agha havino maine.

⁶ Anumaya Kotigae ne'aganageno ago'ma kefo yama humainea yama'amona alika tolege'ya ali lokaeka humainea avamete masufina takika amigeno neno.

⁷ Ani kumai a'mo'a agai'a augafa alino nehaino ageno ha'yema hia kava'ma hu-mainea yatetila kagaya ani'a huka augafa agata aisia ya'ene tusi'a aviteno augafahema kalagi aisia ya'ene amio. Ani a'mo'a agupinaga mage huno nehavie ‘Nagaya ala Sauve a'nemo siale mainoanagi'na megusa akefa omainoanagino nagaitela kana yamo'a falote hisige'na nagaya avia o'ategahue.’ huno agha havimaine.

⁸ Havianagi ani kefo yama humainea yateti aupa'a nagoke yupa anona'a agata aisia yana falote hugahie. Ani

kumate mainaya vea'mo'ya kasago'ya kaliene amaka tesia ya'ene alite'ya falisage'ya muki'a vea'mo'ya amahau hu'ya avi tegahae. Atamo'a Papiloni kumala tesagali-talegahie. E, tusi'a tokiya'a hanea Anumaya Koti'a havino kaiyekea humateteno anima amaugafa amakata aisia yana tusi yate amamigahie.

⁹ Muki'a Sauve vaya'mo'ya ani kumai akefaenena kumaima he'ya muki'a kefo ya'enema humainaya Sauve vaya'mo'yama ani kumate'ma kae-malesageno ata halinamo'ma agete'ya tusiya hu'ya hamauna hute'ya avia ategahae. ¹⁰ Ani vea'mo'ya agatama aiya yama alia yafena tusi'a koli hute'ya alu'ale heti'ya maine'ya mage hu'ya hugahae 'Vaeha tahau hane tahau hane Papilonia ala kumala tokiya'age kuma'mogagi nagoke yagefi kaugafa kagata yana anonaka'a ago alimainane.' hu'ya hutegahae.

¹¹ Ma mopafima tusi'a miyama alisaya ali'ya ne'aliya vea'mo'ya afeno ya'amima miya hisaya vea'nea omaige'ya ani kumafena amakesa havi havi hu'ya avia ne'ate'ya amaipamo'a kana'age hia yapi maigahae. ¹²⁻¹³ Ani afeno yama miya hisage'ya monea alisia afeno yana kanileta yafateti talo humale ya'ene efe yoleti talo humale ya'ene miyama'amo'a hai-mainea seveliya'ene sesuyagaene haesa ohaesa kenaene ka'yoga'yo humainea kenaene oko kenaene muki'a kanale mana'age yosaene afumo avete talo humale ya'ene miyama'amo'a hai-mainea yosale talo humale ya'ene haesa yafateti talo humale ya'ene kapaleti talo humale ya'ene tokiya'age yafa'ene mana'age kimamufaene

haga'age hige'ya nenaya yamo'ene mana'age halinama nehia ya'ene mana'age masave'ene vaini ti'ene atafi negayaya masave'ene ta'nefa falauva'ene vitimo alagaene pulamakaene sipi sipiene hosi afuene hosimo avayuma nehia kalene vea'mogami amaugafa muki'a miya hige'ya nofipi maine'ya miya o'ali ali'yama ne'aliya vea'nene, ali'ya vaiyatete nehaya afeno'ami miya hisaya vea'nea omaige'ya avia ne'ate'ya amaipamo'a kana'age humainae. ¹⁴ Humainage'ya ani ala kumafena mage hu'ya hugahae 'Muki'a tamaha'yema higetamama ne'aliya afeno'yana ago tamahafale'ya ha'no hutalae. Kanale miya afenotamiene konagali yatamiene ago ha'no hianagitama nago'ene o'aligahae.' hu'ya hugahae.

¹⁵ Hute'ya ani vea'mo'ya ani ala kumapiti'ma afeno'ya'amileti monema hu-hati'yama ne'aliya vea'mo'ya ani ala kumate'ma mainaya vea'mo'ya kefo yamo anona'amia amakatama aiya yana aliya yafe tusi'a koli hute'ya alu'ale heti'ya maine'ya avia ne'ate'ya kalagila ne'ai'ya hamauna hugahae. ¹⁶ Nehu'ya mage hu'ya hugahae 'Vaeha tusi'a tahau nehane tahau nehane. Nayona kanale kenaka'a haesa ohaesa kenaene oko kenaene fai-lineka konagalima ali-maleneka kanileta yafateti talo humale ya'ene kanale miyama'amo hai-mainea seveli'ya'ene kaugafale vai-lineka konagalia ali-maleka nemainane. ¹⁷ Nemainanagi nagoke yagefi muki'a ani ala mone afeno yaka'a muki'a ali haviya hugatae.' hu'ya hugahae.

Nehisage'ya 'Muki'a tipi kalefi kava vaya'ene tipi kalema ali'ya vai ne'ayaya vaya'mo'yaene ani tipi kalefima ali'ya ne'aliya yapiti miyama'a ali-mainaya vea'nene alu'ale heti-maina'ya Papi-loni kumala agegahae. ¹⁸ Ne'age'ya Papi-loni kumala atamo'ma teno asagaligeno hali-namo'ma muti muti hia yana ne'age'ya mage hu'ya hugahae 'Ani kumala muki'a kumala agase-mainea kumalageno teno ali haviya nehie.' hu'ya hugahae. ¹⁹ Nehu'ya ta'nefa kate'ya amanupi aite'ya avia ne'ate'ya hamauna nehu'ya mage hu'ya hugahae 'Vaeha ala kuma'mogae tusi'a lahau nehane.' Muki'a tipi kaleyagamona amafahe'ya anile visaya'amo'ya miya'amima ani kumategatila ala hu'ya ne'aliyanagi nagoke yagefi haviya-tafana hane.' hu'ya hugahae.

²⁰ Hugahayanagi tamakaya ikapinaga mainaya vea'mo-gatamaene Yisasina tamaku'a aminaya vea'mo-gatamaene Aposolo vaya'mo-gatamaene Anumaya Koti aune vea'mogatamaene ani kuma'ma ali haviya hutalea yafena muse hiho. Ani ala kuma'mo tamakaila ali haviya hu nelamatea yafenagino Anumaya Koti'a kefo yama'amo anona'a ago amine hutama hiho." huno humaine.

²¹ Higeno nagola tokiya'age ensole kanomo'a nagola tusi'a yafakefa alisaga huteno hagelipi haga'yu hu ne'ataleno mage huno hie ani ala yafakefama haga'yu hutaloa yamo'a Anumaya Koti'a ani avamete huno ani Papilonia ala kumala, alino tusiya huno ali haviya huteno alino haga'yu hu-talenageno fanane hinage'ya nago'ene vea'mo'ya o'agegahae.

22 Yave'yamo'ma agema ne'aiya ya'ene alu'a alu'a yagamema nehaya ya'ene kapufama nehaya ya'ene ufema nehaya yamo'enena nago'enena agea aisige'ya ohavigahae. Veamo'ya kagaipina nago'ene ali'yana o'aligahae. Talo tala hu'ya imuma kiya kanafima kema yeso nehisaya kea nago'ene ohavigahae. 23 Nayona kagai veamo'ya miyana hu hatisaya ali'yama ne'aliya veamo'ya ma mopafina ala vea'ne mainagetama tamakaya alu'a alu'a hanageke yama humatenaya yamo'a muki'a veala ayemavataga hu-mainayafe Anumaya Koti'a tamakai kumala ali haviya hutaleneanagino tamakai kumatela ka'ni'mo'a nago'ene aivasa ohugahie. A'nema aligahe hageno a'mo'a vema aligahe hige'ya musema nehaya kemo'a tamakaipina nago'ene falote ohugahie.

24 Anumaya Koti'a ageana ani kumate mainaya veamo'ya Anumaya Kotina amaku'a aminaya vea'nene agai amaune vea'nenena ma mopafina kasago'ya vea'nenena hamae'ya falimatenaya kolamo'a ani kumapina hanea yafe auhanageke yama'amo'ene hanea yateti Anumaya Koti'a ali haviya hutegahie.

19

Ikapinaga mainaya veamo'ya Papiilonima haviya hia yafene muse humainae.

1-2 Nagaya anile havugeno kasago'ya ikapinaga mainaya veamo'ya ala kegefafiti mage hu'ya hae

“Tagaya Anumaya Koti agia alisaga hisune. Anumaya Koti'a kaiyekema humategahena kanale'ya huno kelamage keleti fatago huno kaiyekea hu ne'amateno ani kumai a'mona tokiya'ama hanegeni muki'a ma mopafi veafena ‘Kefo yama hiho.’ huno ali haviya hu ne'amatea yatetila Anumaya Koti'a ani kefo yamo anona'a ago amine. Ani kumai a'mo'a Anumaya Koti ali'ya veala hamaeno falimateneanagino ani yateti Anumaya Koti'a kefo yama'amo anona'a ago amine. Amineanagita Anumaya Koti agia alisaga hisune. Anumaya Kotitimo'a agai'age tokiya'age hale yamo aepa maineanagino tagu tamena ago aligati-maineanagita agia alisaga nehune.”

³ Ete'ya ala kegefaleti nago'ene mage hu'ya hae “Tagaya Anumaya Koti agia alisaga hisune. Ani kumala atama leno asagali-talia yapiti halinamo'a agola haige haige huno nehaiya yafe Anumaya Koti agia alisaga hisune.” hu'ya humainae. ⁴ Nehage'ya tueti fo'a (24) kava vaya'mo'yaene fo'a (4) hamaimu'ene anaga'mo'yaenena ala sauve kanomo siale mainea Anumaya Kotite asaga hulavi'ya amako'ya yemaine'ya agia alisaga nehu'ya mage hae “Tamagelafa hu'ya nehayanagita Anumaya Koti agia alisaga hisune.” hu'ya humainae. ⁵ Nehageno ala sauve kanomo sialeti nago kemo'a falote huno mage hie “Tamakaya Anumaya Koti ali'ya ne'alitama aiyafinagama mainaya vea'mogatamaene afa vea'nene tamakima hanea vea'nenena Anumaya Koti agi alisaga hiho.” huno humaine.

Sipi sipi nafa'nemo'a a'ne alige'ya kave talo tala hu-malenaē.

⁶ Anile nago kea havuana kasago'ya vea'mo'ya alitalu hu'ya maine'ya ailalupe'ya haya kemo'a, timo'ma anama nelavino agema ne'aiya avamete nehu'ya, monagemo'ma nehia avamete hu'ya ala kegefafiti mage hu'ya hae “Anumaya Koti agia alisaga hisune. Anumaya Kotiti muki'a tokiya'a hanegenō kasago'ya kava vea'mogamina amakaseno agai'age ala kava kano maineanagita agia alisaga hisune. ⁷ Sipi sipi nafa'nemo'a* a'ma alisia kanamo'a ago falote higeno alisia a'mo'a ago talo tala huno maineafe tagaya tusi'a muse nehuta taipa kanale yapiti yagamea huta Anumaya Kotina tokiya'age hale yama'a hanea agia alisaga hisune. ⁸ Anumaya Koti'a oni'ya ohuno efe'age humainea kena ani a'mona amigeno fai-line.” hu'ya humainaē. Ani kenahema hiana Yisasina amaku'ama amitafa hute'ya alu aotage vea'nema fatago hu'ya nemaiya vea'mogami au'avafe humaine.

⁹ Anile ensole kanomo'a Yisasina amaku'a aminaya veafena mage huno nahapaiye “Kagaya mani kea avopi kao. ‘Sipi sipi nafa'nemo'a a'ma alisia imua ago kimalegeno ‘Eho' huno ke humalenagi'ya esaya vea'mo'ya tusi'a muse hisae.’ Mani kea Anumaya Koti kelamage kea hugeka nehavine.” huno humaine. ¹⁰ Hige'na nagaya ani ensole kanomo agia alisaga hugahe aiyafi asaga hulavi'na nago'ya yemaugeno “A'aogi kagaya na'a ohuo. Nagaya kagai'ene kafukagana'yaenena, Yisasi kema havitama atafa hulinetama huhaletama nehaya vea'mogatamaene

nagoke ali'ya ne'aluna kano mainogi nagai nagia alisaga ohuganagi Anumaya Koti agi'age alisaga huo. Yisasi'ma humainea kemo'a Anumaya Koti kema huhale'ya hisaya tokiya vea'mogami amamine.” huno nahapai-mainie.

Yoni'a ageana nago kanomo'a efe hosimo agupifi mainegeo agemaine.

¹¹ Ikamo'a aihagalo hige'na agogeno nagola efe'age hosimo'a mainege'na age-mainoe. Ani hosimo agupifima maiya kanomo agimo'a ma'a humaine “Efi efi huno kanale ali'ya ne'alia kanoe. Kelamage kege'ya nehia kanoe.” hu'ya agia aye-mainae. Ani kanomo'a fatago huno kaiyekea humateno nago'a vea'mo'yaenema tuma hisiana fatago yateti huno tua nehie. ¹² Aulagamo'a atamo ka'ni kana huno aiha nelegeno anutela ala Sauve vaya'mogami tumano ku'yaga kasago'ya vai-linegeno augafalela nago agia kae-malegeno ani agia agai'age havilinea agi haneanagi'ya muki'a vea'mo'ya ani agia ohavinae. ¹³ Agai'ama fai-linea kolamo'a aya'aya kena'ale tusiya humainegeo Anumaya Koti aepama hugafino humainea yafe agima ayayana “Anumaya Kotina ke'ae.” hu'ya agia ayeminae. ¹⁴ Ikapinaga ati vaya'mo'ya efe hosiya'gamo agupifi maite'ya kanale'ya huno efe'age huteno oni'ya ohu kena, faili faili hu'ya akavela uminae. ¹⁵ Ne'vageno muki'a ma mopafi vea'nema hamaesia ave'ne'ne humainea naepea avayafina aniline. Ani-lineanagino amakaseno hagote Sauve kano maineno tokiya'age huno muki'a vea'mogamina kava humategahie. Humateneno

vea'mo'ya nofi alagayaga amaiyaleti'ma aye lata-pageno tima'amo'ma nelavia avamete kava huno ani kanomo'a tusi'a tokiya'ama hanea Anumaya Koti'a haima vai ne'amatea kame vaya'a kefo yamo anona'amia amamigahie. ¹⁶ Ne'amamino kena'ale'ene aiya amote'enema kae-malenea agimo'a ma'a humaine “Ala Sauve vaya'mogamina ala Sauve kano'amie. Ala kava vea'mogamina ala kava'ami mainea kano.” huno agia kae-malene.

¹⁷ Kae-malenege'na ne'agogeno nago ensole kanomo'a yagemo aui hetino muki'a ikamo amu'note hale'ya vai-yayea namayagahena mage huno hie “Tamakaya Anumaya Koti'a ala kave'ma taloma humalea kavetela melitalu hiho. ¹⁸ Melitalu hutama fali-mainaya Sauve vea'nene ati veate kava vea'nene mai-lokiya vai'ya nemaiya vea'nene hosi afuyagaene ani hosimo agupifi nemaiya vaya'ene, nofipi maine'ya miya o'ali ali'ya ne'aliya vea'nene afa'a mainaya vea'nene, ala amakiene vea'nene, osi amakima hanea vea'nene muki'a falisagetama amakaila amaugafamo amamela negahae.” huno humaine.

¹⁹ Hige'na nagaya agoana ani kefo afai afuene ma mopafi Sauve vaya'ene ati vaya'amienena efe hosimo agupifima maiya kanoene ati vaya'aene tu hugahe melitalu humainae. ²⁰ Na'a hayanagi anima efe hosimo agupifima maiya kanomo'a kefo afai afuene havigege'yama nehia aune kanoene alino nofi hunatene. Ani kefo afai afumo'a hapaigeno ani havigege'yama nehia aune kanomo'a

tokiya'age avame yana humane. Nehuno anima tokiya'age avame-name yama humanea yateti amaugafalela kefo afai afumo agia kae-malenge'ya kefo afai afumona amema'amo agima alisaga nehaya vea'nena havige aye mavataga humane. Anima aye mavatagama humanea kefo afai afuene havi aunema laga humanea kanoene hanaege'ana ofalina'agi afa'a hanaimula hanege'ya anavale'ya tusi'a komugefa hi'mana'age yafa'yagama hanegeni atama tegelege nehia komufi anasaga huno vai-talena. ²¹ Vai-taleteno efe hosimo agupifima maiya kanomo'a muki'ama melitalu humainaya ati vaya'mogamina aya'aya naipea avayafina ani-lineanagino ani naipeleti hamaege'ya falimaina. Falige'ya muki'a namayagamo'ya ani vea'mogami amaugafa aye laga-fe'ya nageno tusiya huno amamupa-ropa ayemaine.

20

Satanina vani tauseni'a (1,000) kafu nofi huteno maine.

¹ Nagaya Yoni'na agogeno nago ensole kanoa ikapinagati elavi-maine. Ani kanomo ayapina ayola omale komule ki nofi'ene aya'aya seni nofi'ene hanegeni elavi-maine. ²⁻³ Elavia'amo ani osifa'vea metafa humane. Ani osifa'vea ehe kanafima mainea osifa'vea kame kanotigino agia Satani'e. Ani Satanina metafa huno tokiya'age seni nofila kiteteno anima ayo'ma omale komufina asaga huno vai-taleteno avaya tileno tokiya'age hutegeni Satani'a vani tauseni'a (1,000) kafu ani komufina nofipi

maineanagino ani kanafina vea'mogamina havigea aye mavataga ohugahianagino vani tauseni'a (1,000) kafuma ha'no hutesigeno'a ani komufitila atalesigeno aupa kana kano'afi ute ete hugahie.

⁴ Anile nagaya agoana nago'a veala ala sauve vaya'mogami siale mainageno Anumaya Koti'a kaiyekema humate'ya ali fako humatesaya ali'yamo tokiya amamine. Ani vea'mo'ya Yisasina amaku'a amite'ya agai kene Anumaya Koti kene hamapai-mainaya yateti'ma amake'ya hataga hage'ya falimainaya vea'mogami amamena age-mainoe. Ani amamema agoa vea'mo'ya kefo afai afuene talo hu-malenaya ame'ene agiene alisaga ohu'ya kefo afai afumo agienema hamanile'ene amayate'lenema omalene. Omalea vea'mo'ya ete'ya hamaimula alite'ya ala kava vea'ne maine'ya Kalaisi'ene vani tauseni'a (1,000) kafua kava yagai'ya maigahae. ⁵ Ani vea'nema heti-mainaya kana hagote-lamate'ya fali-mainaya veala hetisaya kana hane. Haneanagi nago'ama fali-mainaya vea'mo'ya ani kanafina heotigahagi vani tauseni'a (1,000) kafumo'a ha'no hu-tesige'ya hetigahae. ⁶ Anima hagote'ya hetisaya veala Anumaya Kotina alu aotage vea'ne'a mainayanagi'ya tusi muse hugahae. Anumaya Koti'a tegelege nehia atafina amatesige'ya nago'ene ete'ya tole molia kanalela ofaligahae. Ofaligahayanagi'ya Anumaya Kotigani Kalaisigani anakia alisaga nehu'ya ali'ya vea'ani maine'ya vani tauseni'a (1,000) kafua Kalaisi'ene sauve kava maigahae.

Satanina agola ali haviya hutene.

⁷ Haenaga'a vani tauseni'a (1,000) kafumo'a ha'noma nehigeno'a Satanina nofi'ma hutenea nopitila atalesigeno ehaigahie. ⁸ Hati-lavino visia'amo muki'a mopaene mopaene mainaya vea'mo-gami amakia Kogi nofi vea'nene Magogi nofi vea'nene Satani'a havige huno aye-mavataga hisia'amo “Melitalu hutama tu hiho.” huno amavaleno melitalu hu-matesige'ya ani vea'mogami napamo'a ti kahaepa kana hu-maineanagi'ya huyo okigahae. ⁹ Ani vea'mo'ya muki'a kotega vai ne'aye'ya Anumaya Kotina amaku'a aminaya vea'mogami kumala, Anumaya Koti'a muse nehia ala kuma'mona meli kagi'ya amavayagigahayanagi ikapinagati atamo'a elavisia'amo ani vea'mogamina tesagali ha'no hugahie. ¹⁰ Ha'no hinageno Anumaya Koti'a Satanina, havigema aye mavataga humainea kanomona, ata neleno hi'mana'age nehia yafa'yagama tegelege nehia komufina asaga huno vaigahie. Ani komufina kefo afai afuene havigema nehia aune kanoene maina'a komufinagino ani lagufa (3) vayala anifinaga maine'ya kege'ene felugaene muki'a kanafina agola amagata aige aige hisia yamo'a hanetafa huno hanemategahie.

Anumaya Koti'a tusi'a kaiyeke humategahie.

¹¹ Anile nagaya Yoni'na himonafi kana yapi agoana ala efe'age ala Sauve kanomo sia hanegeni ani siale mainea kanoa age-mainoe. Agogeno mopamo'ene ika'mo'enena agai aulela fale'ana fanane hu'ana nago'ene omaletafa

humaina'e. ¹² Nagaya fali-mainaya vea'ma agoana amaki hanea vea'nene, amakima omale vea'nene, ala Sauve kanomo aule heti-mainageno ensole vaya'mo'ya avo'yaga ali vakaye-mainae. Nago avona, maige maige hisaya hamaimu'ma hanea vea'mogami amakima hanea avo'ene vakaye'ya ani avopina ago'ma humainaya au'ava kava'amimo kema kae-malenaya keleti fali-mainaya veala Sauve kanomo siale maiya kanomo'a kaiyeke'amia fako humatene. ¹³ Hage lipima fali-mainaya veala ani limo'a amatalege'ya uva'yi hu'ya mo heti-mainage'ya fali yamo'ene fali-mainaya vea'mo'ya ne'vaya kotegaene anakaipima mainaya vea'mogamina amatala'age'ya ete'ya hetigeno Anumaya Koti'a humainaya au'ava yateti kaiyeke'amia fako humatene. ¹⁴⁻¹⁵ Kaiyekea humateteno muki'a vea'mogami amakimo'a maige maige hisaya hamaimu'ma hanea vea'mogami amaki hanea avopima amakima okaenesaya veala Anumaya Koti'a atama tegelege nehia komufi amavaleno haga'yu huma-talegahie. Fali ya'ene fali vea'mo'ya unemaiya ko'ene ata tegelege nehia komufi anasaga huno vai-talesige'ana ha'no hutafa huga'e. Ani atama nelea komufima visayana tole (2) yupa ete'ya faligahae.

21

Haegafa ika'ene mopaene falote hugahie.

¹ Nagaya Yoni'na agoana hageteno'ma hanea ika'ene mopaene hage limo'ene fanane higeno haegafa ika'ene mopaene age-mainoe.

² Nagaya alu aotage kumala, haegafa Yelusalemu, Anumaya Koti'a ikapinagati ataleno elavige'na agoe. Agogeno a'mo'a vema aligahe kanale kenama fai-lineno kanale konagali ali-maleno vele'ma ne'via augafa kava huno elavige'na age-mainoe. ³ Nagaya havugeno ala sauve kanomo sialeti nago ala kegefafiti mage huno hie “Menia Anumaya Koti'a vea'nene tokaeno maigahie. Ani vea'mogami amu'nopi mainesige'ya muki'a veala agai'a vea'ne maisageno Anumaya Koti'ami maigahie. ⁴ Maineno amaunua aye ha'mi-talesige'ya nago'ene veala ofaligahae. Amaipamo'a kana ohinage'ya avia o'ategahayanagino amakata aisaya yamo'enena ha'no hugahie. Nayoma nemaiya augafa au'ava yamo'a ani kanafina ha'no hugahie.” huno hu-maine.

⁵ Higeno ala Sauve kanomo siale'ma maiya kanomo'a mage huno hie “Haviho nagaya muki'a yana ago ali'na haegafa'age hu-maluanagino haegafa huno hanegahie. Mani kea tamage nehue. Muki'a vea'mo'ya havi'ya amakupi male'ya amametiti hisaya yafe mani kelamage ke nehugi kae-malo.” ⁶ Mage huno nahapaiye “Muki'a ali'yania hai alivaya aye-mainoe. Nagaya muki'a tokiyamona aepa'a mainoanagi'na kava yagai-mainie'na muki'a yana ali vayayeso kano mainogi uhagote'na maite'na haenagalafa mainoe. Vea'mo'ya tifema amakesige'ya hamaimu alisaya tina kapa'ima nehagea tinagi'ya miya ohugahagi afa'a amamisuge'ya negahae. ⁷ Vea'mo'ya Sataliene tuma hu'ya agasesayana nagaya mani kanale ya'yaga afa'a amamigahue. Amamite'na

nagaya Anumaya'ami maisuge'ya amakaya naga'i nafa'neyaga maigahae.

⁸ Maigahagi koli nehaya vea'nene, nagaifema havi'ya amakupima nomalaya vea'nene, amaku'amo oni'ya'age humai vea'nene, vea'ma hamae'ya falimate vea'nene, kumai he'ya vai ne'ayaya vea'nene, hanageke kava'ma nehaya vea'nene, ago fali-mainaya veafe 'Anumayati maine.' hu'ya amakisana ne'vaiya vea'nene, havige'age vea'nene hi'mana'age atama nelea yafa'yagamo'a atama tegelege nehia komufi hanea yate tavi'ya maigahae. Ani vea'mo'ya hagote'ya fali-mainayanagi'ya ani atama nelea komufima visayana tole (2) yupa ete'ya faligahae.”

Yoni'a haegafa Yelusalemua ikapinagati age-maine.

⁹ Anile seveni'a (7) yopafi, haenagalafama Anumayamona hai vai-mateno ali haviya humatesia yama'a hanea yopayagama atafa hu-linaya ensole veapiti nago kanomo'a nagaifena mage huno hie “Kagaya ege'na Sipi sipi nafa'nemo'a menima a'ma alitesia a'nea kavelino.” huno hie. ¹⁰ Hige'na Alu Aotage Avamu'mo'a tusiya huno natafa huteno navaleno nagola anayapi hai-mainea ago'yafi mo nateteno alu aotage kumala, Yelusalemua, Anumaya Kotitegati ikapinagati ataleno elavia kumala naveli-maine. ¹¹ Navelige'na agoana Anumaya Kotina tokiya'age hale yama'amo'a ani kumatela aivasa humane. Hale yama'amo'a tusiya huno alu'a augafa kava huno

ala miyamo hai-mainea yafateti'ma aivasa nehia avamete kava humaine. Ani yafamo agia yasipa taugosama ne'agona galasimo'ma nehia kava huno alave alave hige'na halege'na age-mainoe. ¹² Ne'agogeno ani ala kumatela kegi'ya anayapi hu-malageno hane. Ani kegi'ya kovefina tuelufu'a (12) fiana hane. Ani fi-amo amete ametela ensole veala heti'ya maite maite humainae. Ani fitatela tuelufu'a (12) Isaleli nofi vea'mogami amakia kae-malena. ¹³ Ani kegi'yafima hanea fiana yagama va'yi nehilega tagufa (3) fiane. Yagama tavi nefalea kaiyaga tagufa (3) fia hane. Aluga aluga haopalega nago haopalega tagufa (3) fia hanegenonago haopalega tagufa (3) fia hanegenohumaine. ¹⁴ Ani kegi'ya ala kumate'ma aye-govema hu'ya kegi'yama humalayana hagote'ya tuelufu'a (12) yafana amalaguma aimale yatela maletе'ya kegi'ya hu-malena. Ani yafatela Sipi sipi nafa'nemona tuelufu'a (12) aposolovaya'mogami amakia kae-malena.

¹⁵ Nagai'enema kea kea hia ensole kanomo'a ani kuma'ene kegi'yaene fia'ene maleno agege gege huno hapaligahe kanileta yafateti talo humale ka'yona ali-line. ¹⁶ Ali-lino ea'amo me maleno ageana ani ala kumala aya'aya'amo'ene nago kaiyaga'amo'ene anayafima hai-mainea'amo'enena nagotineno nago avamete tueti tu hataleti (2,200) kilomita higeno muki'amo'a nago avamete humaine. ¹⁷ Higeno maleno ne'agea ka'yoteti ani kegi'yamona maleno ageana amegama hanemamo'a vea'mo'yama male'yama ne'agaya

augafa kava huno vani hataleti fotifo (144) mita humaine.

¹⁸ Ani kumate kegi'ya Anumaya Koti'ma hu-maleana ala monemo hai-mainea yafana yasipae nehaya yafateti hu-malene. Hu-maleteno ani kumatela kanileta yafateti ki-malegeno aivasa huno alave alave hia yamo'a galasimo'ma hia kava humaine. ¹⁹ Ani ala kumate'ma amalagu aimale yate'ma hu-maleana kegi'yale malenaya yafana ala miyakefa hai-mainea yafateti malete malete huno humalene. Hagoteno'ma malega'mae-malene yafamo agia yasipa. Anima tole molia yafana oko yafamo agia sapaiya malene. Anile tagufama (3) molia yafana nagola efe'age yafamo agia agetie huno malene. Anile foa (4) molia yafana yosa haisa yafamo agia emelalie huno malene. ²⁰ Anile faefu (5) molia yafamo'a efe'ene haesa'ene havigu humainea yafamo agia satonikisie huno malene. Anile sikisima (6) molia yafana haesa yafamo agia konilianie huno malene. Anile seveni (7) molia yafana kanileta yafamo agia kalisolaitie huno malene. Anile eiti (8) molia yafana yosa haisa yafamo agia pelie huno malene. Anile naeni (9) molia yafana nagola kanileta yafamo agia topasie huno malene. Anile teni (10) molia yafana yosa haisa kaliteno kaniletama'a hanea yafamo agia kalisopelesie huno malene. Anile aleveni (11) molia yafana oko yafamo agia haiyasinie huno malene. Anile tuelufuma (12) molia yafana haesa yafamo agia ametisie huno malene. ²¹ Ani kuma'mo kegi'yale'ma hanea fita tuelufu'a (12) fitmona miyama'amo'a hai-mainea seveliyateti

talo humale fita hane. Nagoke nagoke fitalela nagoke ala seveliyateti talo humalene. Ani kumate'ma visaya katela kanileta yafateti talo humalenegeneno alave alave nehigeno akalo kate'ma he-nemalaya galasimo'ma hia kava hige'ya age hagalo hu'ya age-mainae.

²² Agogeno ani kumatela nagola mono nona omalege'na age-mainogi tusi'a tokiya'a hanea Anumaya Koti'ene Sipi sipi nafa'nene ani kumatela maina'age'ya muki'a vea'mo'ya anakai anakima alisaga haya yafenagino mono no kana hu'ana maina'age'na age-mainoe. ²³ Agogeno ani ala kumatela yagemo'ene ikamo'ene aivasa hisia ali'ya'ania omalegi Anumaya Kotina tokiya'age hale yama'amo ani kumatela tusiya huno aivasa hu-maigeno Sipi sipi nafa'nemo'a ani kumate ka'nila maine. ²⁴ Maina'ageno ani kumateti hale yamo aivasa hu-mainege'ya muki'a koteti vea'mo'ya vai ne'yesage'ya muki'a ma mopafi Sauve vaya'mo'ya kanalenale ya'amia ali'ya ani kumate esa'ya'amo'ya emagahae. ²⁵ Mainesageno ani kumatela hanina okigahanagi'ya ani kegi'yamo fita ali'ya okigahae. ²⁶ Muki'a vea'mo'ya konagali ya'amienne ala amakiene ali'ya ani kumateke'ya egahae. ²⁷ Egahayanagi kefo yama'age'ma nehaya vea'nene, amaku'amo oni'ya'age humainea vea'nene, havige'age vea'nenena ani kumatela ometafa hu'ya omegahae. Omegahagi Sipi sipi nafa'nemo avopima, maige maige hisaya hamaimu'ma hanea avopima amakima kae-malenesia anaga'mo'ya amakai'amige ani

kumatela ehaigahae.

22

Yoni'a hamaimu amamisia ti'ene yosaene age-maine.

¹ Anile ani ensole kanomo'a nagola ala tikefa, hamaimu ne'amamia tina naveli-maine. Ani limona telelalayama'a omalegeno galasifima age-hagalo nehia kava nehigeno ani limo'a Anumaya Koti'ene Sipi sipi nafa'nemogani maina'a sialeti ani limo'a elavi-maine. ² Elavia timo'a aiyayeno ala kuma'mo kamona amu'nopi nelavigeno ani timona aluga aluga agegayale hamaimu ne'amamia yosayaga hane. Ani yosayagamo'a nago kafumo agu'afina tuelufu'a (12) kanale ikama'ahe ikama'ahe ani alagamo'a afula ne-leane. Ani yosamo haisamo'a muki'a kotega vea'ma kali alisagenofena alino falu hu-matesia yosa haisa hane.

³ Nago'a Anumaya Koti'a hinageno ali haviya humatesia yana omalegahigi Anumaya Koti'ene Sipi sipi nafa'nene nemai'a sialatana ani kumatela hanesige'ya Anumaya Koti ali'ya vea'mo'ya agia alisaga nehu'ya maigahae. ⁴ Maine'ya Anumaya Koti aufina ne'agesageno agai'a agia hamanilela kaemategahie. ⁵ Ani kumatela nago'ene hanina okigahie. Anumaya Koti hale yamo'a aivasa humategahianagi'ya nago'ene ka'nila hanagalisaya ya'ene yagemo'enena aivasa ohugahie. Amaku amamema agigati-mainea vea'mo'ya agola kava yagai'ya maigahae.

Yisasi'a aup'a'a huno egahie.

⁶ Ani ensole kanomo'a mage huno hie “Manima nehavina kea kelamage kea hanegeka kagupi malesana ke hane. Anumaya Koti'a amaune vea'ne'ahena ‘Na'a hutama hamapaiho.’ huno amaku amakesa ne'amamia kanomo'a ensole kano'amona agai ali'ya vea'nele hutegenoa'amo muki'a yamo'a aup'a'ama falote hisia yana amave-lisiafene huno hutegenoa'umaine.”

⁷ Haviho. Yisasi'a mage huno humaine “Nagaya aup'a' kanafi egahue.” huno hige'na nagaya mage hue “Nago'a vea'mo'ya Anumaya Koti'a haenaga falote hisia yafe mani avopima humainea kemo akave nemalesaya vea'mo'ya tusi'a muse hugahae.”

⁸ Nagaya Yoni'na ani ya'yaga agete'na mani kea ago havimainoe. Muki'a ani yana nave-lige'na agete'na havimaine'na ensole kanomo'agia alisaga hugahe aiya'afi ape humainoe.

⁹ Huanagi ani ensole kanomo'a mage huno hie “Kagaya na'a ohuo. Nagaya kagai'ene amaune kafu-kagana'yaene muki'a mafima Anumaya Koti avopima hanea kemo akave nemalaya vea'nene ali'ya amafalu'na mainoanagika nagai nagia alisaga ohuganagi nagoke Anumaya Kotina agai'age agige'ya alisaga huo huno hie.”

¹⁰ Huteno mage huno hie “Manima Anumaya Koti avopima hanea kemo'a aup'a'a falote hisia yafe kagaya ani kea fala okio. ¹¹ Ani kanamo'a aup'a'a falote hugahe nehiafe kefo yama nehisaya veala nago'ene ani kefo yana mai'ya hisae. Kumai yama nehisaya veala ani kava mai'ya hisae. Fatago kavake'yama

nehisaya veala ani kavake'ya mai'ya hisae. Alu aotage au'ava yapima nemaisaya vea'mo'ya nago'ene ani kava nehu'ya maisae.” huno humaine. ¹² Nehigeno Yisasi'a mage huno hie “Haviho nagaya aupa'a esuana muki'a vea'moya hu-mainesaya avamete amamisua anona'amia ali'na egahue. ¹³ Nagaya muki'a yamona aepa'a maite'na kava yagai-mainoanagi'na muki'a ali'yana ali'na avaya-yesua kano mainoe. Uhagote'na maitena haenaga-lafana mainoe. ¹⁴ Kasago'ya vea'mo'ya kefo ya'amihema havi'ya amaku'ama sese'ma humalenesaya vea'mo'ya musena hugahae. Amaku'a ago'ma sese humalenayafe hamaimu amamisia yosamo alaga ali'ya nene'ya ala kuma'mo fiatela afa'a hai falegahae. ¹⁵ Hai falegahayanagi kefo yama'age vea'nene, hanageke kava nehaya vea'nene, kumai he'ya vaine'ayaya vea'nene, vea hamae'ya faline'amataya vea'nene, ago fali-mainaya veafe 'Anumayati maine.' hu'ya amakisana ne'vaiya vea'nene havigehe muse hu'ya akave nemalaya vea'nene ani kuma'mona malaga maigahayanagi'ya Anumayamo ala kumatela hai'ya omaigahae. ¹⁶ Nagaya Yisasi'na ensole kano'nimona hutogeno tamakaitega ea'amo nagaifema havitama tamakupi malenaya vea'mo-gatamina mani kea hufalote huno tamahapaisie hu'na huteno. Nagai'nige Teviti nofipiti aginagomo'na maine'na Teviti nafa'ne'a mainoe. Nagaya hale yama'aene ka'nefila, natema hagoteno va'yi nehia ka'nefi mainoe.” huno humaine. ¹⁷ Higeno Alu Aotage

Avamu'amo'ene Yisasina amaku'a amitafa humainaya vea'nene Yisasife mage hae “Kagaya eno.” hu'ya hage'ya mani kema havisaya veala Yisasife mage hu'ya hisae “Kagaya eno.” hu'ya hisae. Hisage'ya tifema amakesia vea'mo'ya etama Anumaya Koti'ma afa'a tamamisia timo'a maige maige hisaya tamahaimu tamamisia tinagi tamahaisigetama me neho.

Mani avopima hanea kema havisaya vea'mogatamina Yoni'a tokiya'age ke tamahanepaiye.

¹⁸ Nagaya manima Anumaya Koti kefima aune laga humale kema mani avopima hanea kema havisaya vea'mogatama mani kene alu kene moli lokaetama aya'aya kea ohiho. Tokiya'age ke tamahanepaugi na'ama hisayana Anumaya Koti'a mani avopima tamahanepaiya havi yama falote hulamatesia yamo'a tamakata aisia yanagino tamakaila tamamigahie. ¹⁹ Tamamigahigi nago'a vea'mo'ya manima Anumaya Koti avopima hanea aune kema ali talesayana Anumaya Koti'a mani avomo'ma tamahapaiya kanale yana otamamigahianagitama ani vea'mogatama maige maige hisaya tamahaimu tamamisia yosamo alaga nesaya yana tamaha-falesigetama Anumaya Koti alu aotage kumatela o'ugahae.

²⁰ Yisasi'a mani kema tahapaiya kanomo'a mage hie “Tamage nagaya aupa'a egahue.” huno humaine. Hige'na nagaya Yoni'na mage hu'na nehue “E, tamage Anumayati Yisasiga eno.” hu'na nehue.

21 Anumayatimo'a Yisasi'a kayonema nehia yama'amo'a muki'a amaku'ama amitafa nehaya vea'mo-gatamina tamamisie. Mani kea tamage.

Ke'nia male ha'no hie.

Nagai'ni nagia Yoni'nae.

lxxxv

**Anumayamo'a Haegafa Alino
Hagelafilatenea Kea
The New Testament in the Kanite Language of Papua
New Guinea
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

PDF generated using Haiola and XeLaTeX on 11 Nov 2022 from source files dated 30 Nov 2021

55807fd5-1005-5405-89da-5533a7950c65